

Миляра Саттарова, Сание Саттарова

Къырымтатар тили ве оқъув

2 къысым

3
сыныф





Миляра Саттарова, Сание Саттарова

КЪЫРЫМТАТАР ТИЛИ ВЕ ОКЪУВ

3-нджи сыныф, окъутув къырымтатар тилинде
алып барылған умумтасиль мектеплери ичюн дерслік
(2 къысымда)

2-ИНДЖИ КЪЫСЫМ

Украина тасиль ве илим назирлиги
тарафындан төвсие этильди



«Букрек» нешрият эви
2020

УДК 811.512.19(075.3)

С 21

*Рекомендовано Міністерством освіти і науки України
(наказ Міністерства освіти і науки України від 21.02.2020 № 271)*

Видано за рахунок державних коштів.
Продаж заборонено

ШАРТЛЫ БЕЛЬГИЛЕР:



— суаллер ве вазифелер (запитання і завдання)



— диалог (діалог)



— иджадий вазифе (творче завдання)



— лугъат (словник)



— аталар сёзю (прислів'я)



— тапмаджка (загадка)



— къаинде (правило)

Саттарова М.С., Саттарова С.С.

C21 Кримськотатарська мова та читання: підручник для 3 класу з навчанням кримськотатарською мовою закладів загальної середньої освіти (у 2-х частинах). Частина 2. Чернівці: Букрек, 2020. 112 с.: іл.

ISBN 978-617-7770-73-1

ISBN 978-617-7770-66-3 (Ч. 2)

УДК 811.512.19(075.3)

Саттарова М.С., Саттарова С.С.

C21 Кырымтатар тили ве окъув: 3-нджи сыныф, окъутув кырымтатар тилинде алып барылгъан умумтасиль мектеплери ичюн дерслек (2 къысымда). 2 къысым. Черновцы: Букрек нешрият эви, 2020. 112 с.: ресимли.

ISBN 978-617-7770-73-1

ISBN 978-617-7770-66-3 (Ч. 2)

УДК 811.512.19(075.3)

ISBN 978-617-7770-73-1

ISBN 978-617-7770-66-3 (Ч. 2)

© Саттарова М.С., Саттарова С.С., 2020

© Хайредінова З. Ш., художник, 2020

© Видавничий дім «Букрек», 2020

ДЖУМЛЕ

Джумле акъкъында малюмат

1-мешгъулиет. Окъунъыз. Эр бир джумленинъ сонъунда сесинъизни алчакълатынъыз ве токътав япынъыз.



Къар

Бугунь къар ягъды. Багъ-багъчалар, къырлар, эвлернинъ дамлары беяз чаршафнен къапланды. Тереклернинъ пытакълары къарны котермей, ашагъы эгильген.

Саба къар токътады. Авасы — чатлатыджы аяз. Индже булутларнынъ артындан кунеш де корюнмей.

Сокъакъта голленген сувлар бузлагъан.

И. Паши



1. Метинде къач джумле бар?
2. Эр бир джумледе не акъкъында айтыла?
3. Джумлелернинъ сонъунда насыл ишарет къоюлгъан?
4. Биринджи абзацны дефтеринъизге язып алынъыз.

Там бир фикир ифаделеген сёз я да сёзлер группасына **джумле** дейлер.

2-мешгъулиет. Сол ве сагъ тарафтаки языларны окъунъыз. Языларның къайсы бири джумле сайыла? Не ичюн?

Биз, сыныф, темиз,
тутмакъ.

Биз сыныфны темиз
тутамыз.

3-мешгъулиет. Окъунъыз. Джумлелерни кочюрип язынъыз, нокъталар ерине келишкен сёзлерни тапып къюнъыз.

Кыш. Япалакъ-япалакъ ... ягъа. Азбарда Усеин, Земине ве Селиме къар топу Фатиме ве ... къардан адам ясамагъа башладылар. Оларгъа башкъа ... къошулды.



1. Джумледе сёзлер бири-биринен манаджа багълымы?
2. Бойле язув метин олурмы?
3. Метинге серлевә къюнъыз.

Джумледе сёзлер бири-биринен манаджа багъланып келе.

4-мешгъулиет. Берильген сёзлерден джумлелер тизинъиз. Джумлелерни дефтеринъизге язынъыз.

Бугунь, одун, бабам, Эмир дайым, ве, пычалар.

Анам, пишире, аш.
Решат, одунларны, агъам, парлай.

Мен, исе, арангъа, ташыдым, одунларны.
Эпимиз, чалышамыз, ве, шенъ, яхши.



1. Окъунъыз. Джумлелер манаджа бири-биринен багъланып келеми?
2. Бойле язув метин олурмы?
3. Метинге серлева къюнъыз.



5-мешгъулиет. Шиирни котеринки сеснен, ифадели окъунъыз.

Къаргъалар къарны къаргъай.
Къар! Къар!
Къаргъалар къаргъа агълай.
Къар! Къар!
Къар — къуванч балаларгъа.
Къар! Къар!
Тайып тюше байырлардан
Ча-на-лар!

H. Умеров



1. Шиирде къач джумле бар?
2. Эр бир джумледе не акъкъында айтыла?
3. Шиирни дефтеринъизге кочюрип язынъыз.
4. **Къуванч, къар** сёзлерининъ схемаларыны япынъыз.

Окъув

Тильки ве къашкъыр масал

Бир заманда бар экен, бир заманда ёкъ экен, бир дагъынъи чинде айнеджи тильки яшай экен. Тильки чокъ вакъытлар доланып, аш къыдырып юре. Лякин бир шей тапалмай. Бир даа бакъса, не коръсин, денъиз тарафтандырса даа араба балыкъ кетирелер.



Тильки:

— Балыкъ да лезетлидир, — дей де, арабанынъ огюне чыкъып, ольген киби, ёл ортасына ята. Арабаджы оны корыгенинен, арабадан тюше де, тилькини алып, балыкъларнынъ устюне ата. Айнеджи тилькиниң беклегени де бу экен. Араба кете, о исе ёл бою балыкъларны бирер-бирер ата бере. Соң арабадан тюше де, балыкъларны топлап ашамагъя башлай.

Бу арада шу ерден кечеяткъан къашкъыр тилькиге якъынлаша:

— Достум, манъа да бир балыкъ берсе! — дей.

Тильки бере. Къашкъыр балыкъны ашагъан соңъ:

— Достум, бир балыкъ даа берсе! — дей.

Тильки бере. Къашкъыр бу балыкъны да ашагъан соңъ:

— Достум, бир балыкъ даа берсе, — дей.

— Бар, озюнъ тут да, аша, — дей тильки.

— Я балыкъ насыл тутула?

Тильки къашкъырдан къуртулмакъ ичюн бойле дей:

— Озенге бар, бузны теш де, къийругъынъны сувгъа йибер, балыкълар онъа сарылышлар, ана шу вакъыт къийругъынъны чекерсинъ де, балыкъларны чыкъарырсынъ.



Ахмакъ къашкъыр ойле де япа. Къийругъыны сувгъа йиберген соңъ, тильки келип:

— Соңъ, насыл, бир шейлер дуюламы, балыкълар сарылышп башладылармы? — деп сорай.

Балыкъ ашамагъа тамшанышп тургъан къашкъыр:

— Ёкъ, даа ич бир шей дуймайым, — дей.

Тильки бираздан соңъ кене де суалини текرارлай.

Къашкъыр къуваныш:

— Гъалиба, балыкълар топлана башлады, — дей.

— Сен, къашкъыр, къийругъынъны бираз даа терендже йибер, балыкъ чокъча сарылыш, — деп огрете тильки.

Къашкъыр ойле де япа. Аяз кескинлеше, къашкъыр сувукътан къалтырамагъа башлай.

— Тильки, балыкъларны энди чекип чыкъарайыммы? — деп сорай.

— Ашыкъма, сабыр эт, эки кере къуйрукъ батыргъандже, балыкъларнынъ эписини бирден чекип чыкъарырсынъ.

Къашкъырнынъ къуйругъы бузлап къалгъан соң, тильки энъкъастан яйгъара къопара:

— Вай, къашкъыр, копеклерини артына та-кып, авджы келеятыр да. Тез ол, къачып кете-йик, джанымызын къуртаратайыкъ.

Тилькини тапсань ал, зува. Къашкъыр исе къуйругъыны буздан чыкъармакъ ичюн не къадар тырышса да, чыкъарамай. Бу арада онынъ къулагъына копек авулдысы эшитиле. О, джан аляметинен къуйругъыны бирден чеке, къуйругъы шарт узюлип, буз ичинде къала. Къашкъыр эм къача, эм де къуйрукъ агърысына даянама-ыйп агъламагъа башлай:

— Эй, сени, тильки! Манъа япаджагъынъ бумы эди? Токъта сен, мен сени къолгъа тюшю-риrim, о вакъыт эсаплашырмыз, — дей.

Азмы кече, чокъмы кече къашкъыр тилькини дагъ ичиндеки голь янында якъалай.

— Тутылдынъмы, яланджы! — деп, тишле-рини къайрай. — Санъа ола мен къуйрукъсыз къалдым.

Тильки, гунасы олмагъан киби:

— Алла-алла, къашкъыр, къуйругъынъ не къадар балыкъ котереджегини бильмегенинъ меним къабаатыммы? Чокъ нефисхор олмагъай эдинъ даа, — дей.

Къашкъыр кесен-кес:

— Сен мени алдаттынъ, — дей. — Онынъ ичюн мен сени ашайджагъым.



Тильки шашып къала. Эткенлерине пешман
эте амма, лякин энди не япсын! Башкъа чареси
ёкъ, кене айнеджиликке ура.

— Меним этимден сен ич бир лезет алмазынъ, эм де тоймазсынъ. Сен, эйиси, бейнинь багъчасында отлап юрьген къойны аша. Коресинъми, къуиругъынынъ ягъы салынып, тап ерге тие.

Багъчада къой дегиль де, балабан бир копек бар экен. Къашкъыр дөгъру копек олгъантарафкъачапа. Копек исе онъа атыла. Къашкъыр неге оғрагъаныны анълап, зув-бабам сени, дагъгъа къача ве бир даа тилькинен иш корымейджегине сёз бере.



1. Айнеджи тильки не япа?
2. Къашкъыр тилькиден не сорай?
3. Тильки къашкъырдан къуртулмакъ ичюн не дей?
4. Къашкъырнынъ къуиругъы бузлап къалгъан соң тильки не япа?
5. Къашкъыр къуиругъыны буздан насыл этип чыкъара?
Метинге эсасланып, икяе этиньиз.
6. Тильки ве къашкъырнынъ арекетлерине къыймет кесинъиз.



7. Аталар сёзлерinden къайсы бири масалының эсас фикрине уйгұндыр? Не ичюн?

Чокъқта чапкъан, аздан къуру къалыр.

Яланджылықъунен хырсызылыкъ —
агъа-къардаштыр.



8. Масалы роллерге болип, саналаштырынъыз.



- айнеджи —хитра(-ий)
- энъкъастан — навмисно
- джан аляметинен — з үсіөї сили

Къырымтатар тили

Джумле акъкъында малюмат (девамы)

6-мешгъулиет. Ресимге бакынъыз. Суаллер ве ярдымджы сёзлерге эсасланып, «Кыш» мевзусында икәе уйдурынъыз. Икәни дефтеринъизге язынъыз.





1. Этрафны не къаплады?
2. Балалар тенеффюсте не япалар?
3. Олар насыл кийинген?
4. Этрафта къушлар не япалар?

Ярдымджы сёзлер: бем-беяз, къар, къаплады, тенеффюс, азбаргъа ашыкъалар, къар топу, тереклер, къушлар, этрафта.

7-мешгъулиет. Козенеклер ичине етишмеген арифтерни язынъыз.

	къ	а	р			
1	къ	а	р			
2	къ	а	р			
3	къ	а	р			

1. Тюслернинь бири.
2. Къушнынъ ады.
3. Себзенинъ ады.



Бу сёзлернен учъ джумле уйдурынъыз. Оларны дефтеринъизге язынъыз.

8-мешгъулиет. Тапмаджаны окъунъыз. Джевабыны тапынъыз.

Не ягъа?

Ундыр десем, ун дегиль,
Шекерге де ошамай.
Курьпе десем, о дегиль,
Чюнки къушлар ашамай...



1. Дефтеринъизге язып алынъыз.
2. Къыш акъкында даа насыл шиир ве тапмаджаларны билесинъиз?
3. **Курьпе** сёзүнде къач сес ве къач ариф олгъаныны айтынъыз, схемасыны япынъыз.

9-мешгъулиет. Ибраим Бахшышнынъ шириндөн парчаны окъунъызы.

Орътюнди кенъ памукъ ёргъан
Чайыр, багъ эм багъчалар.
Санки дерсинъ, чечек ачты
Къаргъа чомгъан агъачлар.



1. Чайыр, багъ эм багъчалар ненен орътюнди?
2. **Кенъ памукъ ёргъан** бу недир?
3. Ширини дефтеринъизге кочюринъиз.

10-мешгъулиет. Окъунъызы.



Къыш. Дагъны къар къаплады. Тавшан bem-beяз къар устюнде излер къалдырып, чапып кетмекте эди. Номай пытақълы нарат янына кельгенде абдырап токътады. О, балабан бир кирпиге расткельген эди.

— Сен мени къоркъуттынъ, — деди тавшан кирпиге. — Бойле маальде мында не япасынъ? Сыджакъ юванъда юкъласанъ олмаймы?

— Мен Йылбаш байрамыны къаршыламагъа ашыкъам, — деди кирпи.

— Мен де Йылбашны шу дагъда къаршыламагъа истейим, — дей тавшан. — Эгер разы олсанъ, Йылбашны берабер къаршылайыкъ.

H. Аметовадан



1. Дагъны не къаплады?
2. Тавшан не япа эди?
3. О не ичюн абдырап токтады?
4. Тавшан ве кирпи не акъкында субетлештилер? Оларнынъ субетини роллер боюндука ифадели окъунъыз.
5. Биринджи абзацны дефтеринъизге язып алынъыз. Бу абзацта къач джумле бар?



11-мешгъулиет. Суаллерге толу джевап беринъыз.
Джумлелерни дефтеринъизге язынъыз.

Шимди насыл мевсим?
Кыш айларынынъ адларыны айтынъыз.
Кышта ава насыл ола?
Кышта не ягъя?
Йылбаш байрамы не вакъыт ола?

Окъув

Эскендер Фазыл

Достлар

Базар куню
сыныфдашлар —
Али ве Энвер
чана тартып
къыргъа тараф
чапып кетелер.



Эбет, олар
ашықъалар
чана таймагъа,
ким истемез
бош вакъытта
ойнап тоймагъа!

Чокъъа бармай
къыр устюне
достлар чыкътылар.
Тик байырдан
къоркъмай,
вызnen
олар учтылар.

Авдарыла,
йыкъылалар —
къаргъа чомалар...
Сонъ байырнынъ
энъ уджундан
кene учалар.

Къуваналар,
эп джошалар,
сувукъ къыздыра!



1. Окъунъыз.
2. Али ве Энвер къайда чапып кетелер?
3. Олар не ичюн ашықъалар?
4. Балалар насыл этип зевкъланғанларыны шиирге
эсасланып, икяе этинъиз.
5. **Сувукъ къыздыра** ибаресини насыл анълайсынъыз?
6. **Къыр — байыр** сёзлери насыл маналы сёзлер?
7. Шиирни эзберленъиз.



- тик — стрімкий, крутий
- вызнен — зі швидкістю

Икяе, суаль ве эмир джумлелери

12-мешгъулиет. Джумлелерни окъунъыз.

1. Татам манъа янъы китап багъышлады.
2. Сыныфынъызда къач бала бар?
3. — Огълум, бар тюкяндан отымек кетир.



Къайсы джумледе бир шей акъкъында хабер этиле, къайсы джумле суаль манасыны ифаделей, къайсы бири исе — риджаны?

Джумлелер макъсадына коре учь тюрлю ола: **икяе, суаль ве эмир** джумлелери.

13-мешгъулиет. Окъунъыз.

Къар ягъа, къар ягъа,
Коктен берекет ягъа.
Башланъ, сизлер балалар,
Къардан адам япмагъа.

3. Аппазова



1. Шиирде не акъкъында хабер этиле? Озы сёзлери-нъизнен айтынъыз.
2. **Коктен берекет ягъа** сатырынынъ манасыны насыл анълайсынъыз?
3. Шиирни дефтеринъизге язып алынъыз. Янъгъыравукъ тутукъларнынъ астыны сызынъыз.

14-мешгъулиет. Джумлелерни окъунъыз.

1. Айва татлысы ашкъазангъа пек файдалы.
2. Симеиз къасабасы дагъ этегинде ерлешкен.
3. Осюмликлер авагъа темизлик ве тазелик кетире.
4. Эмен терегининъ агъачы пек къавий ола.



1. Эр бир джумледе не акъкында хабер я да икяе этиле?
2. Джумлелерни дефтеринъизге кочюринъиз, сёзлерни эджаларгъа болип языныз.

Буны билинъиз!

Икяе джумлесинде бир шей акъкында хабер я да икяе этиле. Икяе джумлесининъ соңунда **нокъта (.)** къююла.

Меселя: Бу сене къыш сувукъ эди.

15-мешгъулиет. Окъунъыз.

Къыш кельгенде, ягъа эп къар,
Орталыкъкъа чаршаф япа.
Арекеттен токътап, акъкъан
Сувлар ёлда бузлап ята.

Л. Сулейман



1. Шиирде къач икяе джумлеси бар?
2. Бу шиирде къышнынъ насыл аляметлери тасвирлене?
3. «**Орталыкъкъа чаршаф япа**» сатырыны насыл анъ-
лайсынъыз?
4. Шиирни дефтеринъизге язып алынъыз. Сагыр
тутукъларнынъ астыны сыйынъыз.



16-мешгъулиет. Тезайтымны окъунъыз.

Къартайгъан къартал
Къартал-Къая къобасына къонды.



1. Бу джумледе не акъкында хабер этиле?
2. Тезайтымны дефтеринъизге язынъыз. Эзберленъиз.
3. **Къ** арифинден соң индже я да къалын созукълар
кеle?

Шакир Селим

Къышбабаны беклеп

Къашкыр киби улуй къышта
Къар боранлы аджджы ель.
Тек къышбабай къоркъмай ондан,
Долана о бузып бель.

Долана о эль-юртларны,
О кирмеген эв ёкътыр.
Бакъып чыкъса джап-сыртларны,
Оны беклеген чокътыр.

О эм куньдюз, эм де гедже
Кезип юре, юкъламай.
Къышбабачон къыш эглендже —
Къар уфюрте токътамай.



1. Шиирде не акъкъында айтыла?
2. Къышбаба не япа? Метинге эсасланып, джевап беринъиз.
3. Шиирни эзберленъиз.



- доланмакъ — гуляти
- бузып бель (мында: белини сыкъып байла-
макъ) — за змістом: підперезавшись
- джап-сыртлар — круті схили, гірські хребти
- эглендже — розвага
- уфюртмек — замітати

Къырымтатар тили

Икяе, суаль ве эмир джумлелери (девамы)

17-мешгъулиет. Окъунъыз.

- Сен саба saat къачта турасынъ?
- Мен саба saat едиде турал.
- Тургъандан соң не япасынъ?
- Тёшегимни джыйыштырам, кийинем, бетимни ювам. Соң сабалыкъ ашайым.
- Мектепке saat къачта барасынъ?
- Мектепке saat секизде барам.



Суаль манасыны ифаделеген джумлелерни тапып, дефтеринъизге язып алынъыз.

Буны билинъиз!

Суаль джумлесинде бир кимсе я да бир шей акъкъында сорала. Суаль джумлесининъ соңунда **суаль ишарети (?)** къюола.

Меселя: Сен къайда яшайсынъ?

18-мешгъулиет. Окъунъыз.



Акъ башлы, кок башлы
Булутлар не ашайлар?
Бир ерге топланса,
Козъяш тёкип башлайлар.

Акъ башлы, кок башлы
Булутлар къайда къачты?
Кунеш кулип бакъкъанды
Булутлар юзюн ачты.

A. Сеногъул



1. **Акъ** сёзюне манаджа якъын олгъан сёзни айтынъыз.
2. «**Козъяш тёкип башлайлар**» сатырынынъ манасыны насыл анълайсынъыз?
3. Шиирден суаль джумлелерини дефтеринъизге язнъыз.

19-мешгъулиет. Ресимге бакъынъыз.



1. Бир къач суаль джумлеси тизинъиз, оларны дефтеринъизге язынъыз.
2. Эр бир джумленинъ сонъуна насыл ишарет къоюлыр?
3. Ресимге серлева къоюнъыз.

Буны билинъиз!

Эмир джумлеси риджа, эмир, теклиф, ялварув, насиат, мураджаат киби маналарны бильдире.

20-мешгъулиет. Джумлелерни окъунъыз. Токътав ишаретлерине дикъкъат этинъиз.

1. — Огълум, Ахтем, къана бар, арандан тюневин азырлагъан тахтамызыны алып кель. Экимиз отургъыч ясайыкъ.
2. — Пелит тереги, мен санъа ялварам, йибер мени озь къувушынъа къышламагъа.
3. — Балалар, келинъиз, масалны окъуйыкъ.



1. Джумлелер насыл маналарны бильдире?
2. Джумлелерни дефтеринъизге язынъыз. Хитапларны бельгиленъиз.



21-мешгъулиет. Икяе джумлелерини суаль джумлелерине чевирип языныз.

Нумюне:

Дерс башланды. – Дерс башландымы?

Бизим мемлекетимиз буюк. — ?

Оджа тахтада суаль язды. — ?

Окъув

Эшреф Ибраим

Къар

Ягъар учып, ойнашып,
Йылдыз-йылдыз олып къар.
Мевсимине ярашып,
Озюне хас зевкъы бар.
Адъджы елли къар ягъса,
Чимтири къулакъ, юзюнъни.
Ава тынып, кунь чыкъса,
Къамаштырыр козюнъни.
Кунь нурунда кумюштен
Фаркъы ёкъдай корюнир.
Ахыр-сонъу кунештен
Къоркъкъанындан о ирир.



1. Шиирни дикъкъатнен окъунъыз.
2. Шаир къар акъкъында не айта? Метинге эсасланып, икяе этинъиз.
3. Шиирни эзберленъиз.
4. Аталар сёзлерини окъунъыз. Маналарыны анълатынъыз.



Къышнынъ къары — кузъде берекет.

Къыш къышлыгъыны этмесе,
яз язлыгъыны этmez.

Нида джумлеси

22-мешгъулиет. Джумлелерни догъру интонациянен окъунъыз.

Меним Ватаным — Кырым.
Балалар, күш юваларыны бозманъыз.
Сен не ичюн кеч кельдинъ?

Меним Ватаным — Кырым!
Балалар, күш юваларыны бозманъыз!
Сен не ичюн кеч кельдинъ?!

Икяе, суаль, эмир джумлелери кучълю дуйгъунен ве котеринки сеснен айтылса,
нида джумлелерине чевириле.

Нида джумлесининь соңунда **нида ишарети (!)** къююла.

23-мешгъулиет. Берильген джумлелерни нида джумлелерине чевирип язынъыз.

1. Анълат, не ичюн ойле яптынъ?
2. Софра башында догъру отур.
3. Не де дюльбер манзара.

24-мешгъулиет. Окъунъыз.

Кырым — дюньянынъ тылсымлы бир кошеси. Не къадар адтайип, дюльбер бир ульке! Аvasы темиз ве шифалы. Бу улькеде алчакъгонъюлли, эмексевер ве намуслы кырымтатар халкъы яшай.



1. Биринджи джумледе не акъкъында айтыла?
2. Дөртюнджи джумледе ким акъкъында айтыла?
3. Метинге серлева къюнъыз.

4. Дефтеринъизге кочюринъиз.
5. Нида джумлесининъ астыны сызынъыз.

25-мешгъулиет. Шиирни окъунъыз.

Къыш — рессам



Саба эрте козь ачкъанда,
Абдырап къалдым бирден.
Пенджереде дюльбер орьнек!
Оны ким япты экен?

Гедже ойлап юргенимни,
Аджеп, насыл бильдилер?...
Мен япаджакъ орьнеклерни
Къыш озю япкъан дюльбер!

А. Сеногъул



1. Нида ве суаль ишарети олгъан джумлелерни насыл окъумакъ керек? Оларны дефтеринъизге язып алынъыз.
2. Шиирде насыл дюльбер орьнеклер акъкъында айтыла? Олар не вакъыт пейда ола?



26-мешгъулиет. Джумлелерни окъунъыз.

Талебелер (неге?) ... азырланалар.

Олар (не?) ... орендилир.

Байрам (къайда?) ... оладжакъ.

Оджапче (кимлерни?) ... макътады.

Балалар байрамгъа (кимлерни?) ... давет эттилер.



Нокъталар ерине келишкен сёзлерни къойып, джумлелерни дефтеринъизге язынъыз.

Ярдымджы сёзлер: талебелерни, Йылбаш байрамына, мектепте, ана-бабаларны, шиир ве йырлар.



- аджеп — невже
- тюшюномек — думати

Наджие Аметова

Эгиз къозулар



Леваени танъ юкъусындан ашханеден кельген сеслер уяңтты. «Анам сабалықъ емеги азырлай, гъалиба», деп тюшюнди Левае. Бираздан къапу ачылды. Бабасынынъ эеджанлы сеси эшитильди. Онынъ лафларыны Левае анълап оламады. Лякин анасынынъ: «Шимди, сыйджакъ урбаларымны киейим», — деген сесини бир янълышсыз эшилти. Соң къапу япылды. Леваени бу шамата раатсызлады. О, тёшектен сыйчрап турды. Урбаларыны кийди, азбаргъа чыкъмагъа азырланды. Тышта ава сувукъ. Къыш чиллеси укюм сюрьмекте эди. Шу арада къапу ачылып, ичери анасы, онынъ артындан бабасы кирдилер.

— Турдынъмы, къызыым? — деди анасы, — козюнъ айдын, къоюмыз эгиз къозулады.

Левае къувангъанындан: «Айдында олсун!», — деди де, элиндеки тонуны тез-тез кийди. Азбаргъа ашыкъты. Анасы оны токътатып:

— Ашыкъма, къызыым, башта бирер козьайдын къавеси ичейик, сонъ барып бакъарсынъ. Оларны шимди раатсызламакъ олмаз. Озь алларына ятсынлар, — деди.

Левае тонуны биле чыкъармады. Маса башына кечип отурды. Анасы пиширген къавени ашыкъып-ашыкъып ичти. Къавени битирир-битирмез, азбаргъа чыкъты. Арангъа киргенинен, кошеде яткъан уфачыкъ, беяз юнълю къувурчыкъ къозуларгъа козю тюшти. Къозулардан бириси аякъ устюнде тура, экиндjisи ята эди. Ана къой яткъан къозуны ялай, оны турсатаджакъола, гъалиба, кимердебирбашынен къозунъяртаякъларындан тюрте. Къозу исетурмай. Эп ята. Левае къозуларны сыйпады, севди. Ана къой мераметли къызчыкъыны пек яхши таный эди. Левае ана-къойгъа ярдым этеджек олды. Яткъан къозуны котерип турсатты. Къозу бир-эки адым аткъан сонъ, аякълары титреп, ерге ятты.

— Тембель, — деди Левае къозугъа бакъып, — юрьмеге истемей.

Кунь къавушты. Ава баягъы сувуды. Левае раатсызланып башлады. Бабасы иштен кельгенинен:

— Баба, къозулар ушюмезлерми? — деп сорады. — Меним эллерим эки къатлы къолчакъларда биле ушюйлер.

— Къасевет этме, къызыым, олар ушюмезлер. Аран сыйджакъ, яткъан ерлери къуру, — деди бабасы озюни сыйкъмадан.

Лякин бабасынынъ сёзлери Леваени тынчландырмадылар. О, зайыфча къозу ичюн зияде

раатсызланды. «Къозучыкъ уфачыкъ, териси юфкъа, юньлери къыскъа, о озь-озюни къыздырып оламаз», — деп тюшюнди.



1. Леваени танъ юкъусындан нелер уяңтты?
2. Анасы Леваеге насыл хабер айтты?
3. Къызчыкъ не япты?
4. Арангъа киргенинен Леваенинъ неге козю тюшти?
5. Къызчыкъ неге раатсызланып башлады?

Кеч олды. Ярыкълар сёнди. Эр кес татлы юкъуда. Лякин Левае юкълап оламай. Къозуны тюшюне. Левае даянып оламады. Тёшектен турды. Сыджақъ урбаларыны кийди. Баягъы эскирген бала ёргъаныны алыш, азбаргъа чыкъты. Араннынъ къапусыны мукъайтлыкънен ачты. Ярыкъны якъмады. Айванлар уяныр деп, сакъынды.

Къаранлыкъкъа козю алышкъан сонъ, зайыф къозуны мукъайтлыкънен ёргъангъа сарып, къу-чагына алды. Араннынъ къапусыны сессиз-шаматасыз къапатты. Эгерана-къойдуйса: «Бэ-э-э, бэ-э-э, деп къычырыр, башкъа къойларны, атта сыгъырны биле уяңтыр», — деп тюшюнди. Къозуны эвге алыш кирди. Оны соба янына къойды. Къозу козьчиклерини ачты, башчыгъыны котерди. Левае ёргъанынъ бир уджуны къатлап, къозунынъ башы астына къойды. Оны сыйпады. Къозу тынчланды, козьчиклерини юмды. «Юкъла-юкъла, — деди Левае къуванып, — такъатынъ келир». Левае озю япкъан ишинден мемнүн олып, одасына кетти. Татлы юкъугъа далды. Саба юкъудан тургъанда, бабасы ишке кеткен, анасы исе къозугъа сют ичире эди.

— Ана, къозуны бугунь акъшам да эвге ала-йым да, — деди.

Анасы разы олды. Къызчыкъ къувана-къувана къозуны арангъа алыш кетти. Ана-къой баласыны коръгенинен, онъа дөгъру юрьди: «Бэ-э-э, бэ-э-э», — деп къычырды. Левае оны анасына йиберди.

Арадан бир афта кечти. Ава бираз къызды. Уйле маалинде исе кунешнинъ джыллы нурү къарны иритип башлады. Леваенинъ анасы ана-къойны тувар азбарына йиберди. «Бираз юрьсин, аякълары чезильсинг», — деди. Къойнынъ артындан къозулар да бирер-бирер чапып чыкътылар. Оларны бири-бириндөн айырмакънынъ чареси ёкъ эди. Къозулар къызчыкъны къувандырып, кенъ азбарда чапкъалаша, ойнакълай эдилер.



1. Кеч олғанда Левае зайыф къозучыкъны не япты? Метинге эсасланып, икяе этинъиз.
2. Саба юкъудан тургъанда о, анасына не деди?
3. Левае насыл бир къызчыкъ? Онынъ арекетлерине къыймет кесинъиз.



- къыш чиллеси (январь айынынъ энъ сувукъ куньлери) — за змістом: лютий мороз
- козь тюшмек — зупинився погляд
- титремек — тримті
- ушюмек — замерзнути
- юфкъа — тонкий (-а)
- мукъайтлыкъ — обережність
- джыллы — теплий
- чаре — можливість
- чапкъалашмакъ — бігати граючи

Джумле азалары. Джумленинъ баш азалары: муптеда ве хабер

27-мешгъулиет. Джумлелерни окъунъыз. Сёзлерге къоюлгъан суаллерге дикъкъат этинъиз.

ким? къайда? не япты?

1. Мен Алуштада догъдым.

не вакъыт? ким? ким? къайда?

2. Тюневин Вели ве Амза табиат тёгерегине
не яптылар?
бардылар.

нелер? нелер? насыл? ненен?

3. Чименлер ве чайырлар тюрлю чечеклер-
не яптылгъан?
нен ортюльген.

кимге? насыл? ким? не япты?

4. Манъя якъын достум кельди.

Джумледе суаль къоймакъ мумкун олгъан сёзлерге **джумле азалары** дейлер. Эр бир джумле азасынынъ озы вазифеси ола. Джумле азалары **баш** ве **экинджи** дередже азаларына болоне. Баш азалар — **муптеда** ве **хабер**. Олар джумленинъ негизини тешкиль этелер. **Негиз** — джумленинъ эсас манасыны бильдирген къысым.

28-мешгъулиет. Нокъталар ерине ярдымджы сёзлерден келишкен сойларыны сечип язынъыз.

Багъчада (не?)... пишти. Ишчилер алмаларны (не яптылар?) Алмаларны ящиклерге къойып, (неге?) ... юкледилер. (Нени?) ...

консерва заводына ёлладылар. Алмалардан шыра ве (не?) ... япыла.

Ярдымджы сёзлер: машинағъа, хошаф, джыйдыштар, оларны, алма.

29-мешгъулиет. Джумлелерни окъунъыз.

1. Дерс башланды. 2.Шевкет экинджи раледе отура. 3. Амет достларынен дагъгъа барды. 4. Къышта чөль беяз чаршафнен ортюльди.



1. Джумлелерде **ким? не? не япты? не япа?** суаллерине джевап берген сёзлерни тапынъыз. Бу сёзлер джумленинъ насыл азалары ола?
2. Джумлелерни дефтеринъизге кочюриңиз. Муптеданынъ астыны бир сызықынен, хаберни исе эки сызықънен сызынъыз.

Муптеда джумледе ким я да не акъында айтылгъаныны бильдире. Муптеда **ким? кимлер?** я да **не? нелер?** суаллерине джевап бере.

Меселя: Талебе (ким?) окъуй. Балалар (кимлер?) йырлайлар. Бульбуль (не?) оте. Чечеклер (нелер?) ачты.

Хабер муптеда акъында не айтылгъаныны бильдире. Хабер **не япты? не япа? не япаджакъ?** киби суаллерге джевап бере.

Меселя: Бабам кельди (не япты?). Рефат чала (не япа?). Эмджең келеджек (не япаджакъ?).

30-мешгъулиет. Шиирни окъунъыз.

Къар ягъып, bem-беяз олды
Тарлалар, ёллар-излер.
Къарбаба яптыкъ багъчада
Топланып бугунъ бизлер.



Башына кийсеттик къопкъа,
Элине бердик курек.
Эм эпимиз риджа эттик:
— Къарны куремек керек.

А. Сеногъул



1. Балалар багъчада не яптылар?
2. Шиирден **ким? кимлер? не? нелер?** суаллерине джевап берген сёзлерни тапып, дефтеринъизге язып алынъыз.

31-мешгъулиет. Джумлелерни окъунъыз.

1. Селим къартбабасынен берабер ер ... (не япа?).
2. Анифе пенджерелерни ... (не япты?).
3. Мен анам ювгъан чамашырны ... (не яптым?).
4. Ахтем чёплюклерни къопкъагъа ... (не япа?).
5. Къартбабам баарьде тереклерни ... (не япаджакъ?).



Нокъталар ерине келишкен хаберни къойып, джумлелерни дефтеринъизге язынъыз.

Ярдымджы сёзлер: утуледим, пытай-
джакъ, толдура, сюртти, къаза.



32-мешгъулиет. Джумлелерни окъунъыз.

1. ... (ким?) тёшегинден турды ве пенджере-
гэ бакъты.
2. ... (нелер?) түйни ашадылар.
3. ... (кимлер?) тилькичикни айванат багъча-
сына бердилер.
4. Азбарда чешит ... (нелер?) бар.



Нокъталар ерине келишкен муптеданы къойып, джумле-
лерни дефтеринъизге язынъыз.

Ярдымджы сёзлер: эв айванлары, Айдер,
балалар, чипчелер, бабам.

Окъув

Лёман Сулейман

Биринджи акъбардакъ



Къышнынъ сонъу. Аджджы еллер
Кимерде бир даа эсе.
Сабалары къата ерлер,
Кунь сыйдагъын аяз кесе.

Табиатнынъ муджизеси
Ве баарьнинъ хаберджиси,
Осип еткен, ачкъан ап-акъ,
Къокъу сача бир акъбардакъ.



Ширирни эзберленъиз.

Къызыл китап

Акъбардакъларны ве пейгъамбер дёгмеси-ни къопарманьыз! Олар ер юзүнде пек аз къал-дылар, тезден бир тамам ёкъ олып кете билелер.

Къопарылып эвге кетирильген чечеклер сизни бир-эки кунь къувандыра билелер. Лякин олар энди ерде бир вакъыт осип оламазлар.

Акъбардакълар, пейгъамбер дёгмелери «Къызыл китап»къа кирсетильгендирлер. Бу ойле китап ки, анда адлары кирсетильген бутюн осюмликлер ве айванлар ёкъ олов хавфында-дыр. Оларны къорчаламакъ керектир. Чечеклер къырларны ве орманларны, бизим аятымызыны яраштыргъаныны бир вакъыт унутманьыз.

Оларны ёкъ олып кетювден къорчаланьыз!



1. Метинни дикъкъатнен окъуньыз.
2. «Къызыл китап»къа насыл чечеклер кирсетильген?
3. Биринджи ве соňки джумлелернинъ язылувина дикъкъат этинъиз.
4. Къырымда къайсы осюмликлер, айванлар ёкъ олов хавфында-дылар?



Акъбардакъ, пейгъамбер дёгмеси чечеклерининъ ресимлерини япынъыз.



- муджизе — чудо
- баарьнинъ хаберджиси — вісник весни
- ап-акъ — білосніжний
- акъбардакъ — пролісок
- пейгъамбер дёгмеси — конвалія
- хавф — загроза

Джумле азалары. Джумленинъ баш азалары: муптеда ве хабер (девамы)

33-мешгъулиет. Нумюне боюнчада джумлелер уйдурып язынызыз.

- | | |
|----------|---------|
| Ким? | Не япа? |
| 1. Фатма | яза. |
| 2. ... | |
| 3. ... | |
| 4. ... | |

Муптеда ве хаберге джумленинъ **баш азалары** дейлер.

Джумледе муптеда бир сызыкънен, хабер исе эки сызыкънен къайд этиле.

Меселя: Селим йырлай.

34-мешгъулиет. Берильген сёзлерден джумлелер тизип, дефтеринъизге язынызыз.

1. Эшреф, севе, масалларны, динълемеге, тылсыммы.
2. Къюудан, чыкъарды, Шевкъие, сув.
3. Мейданчыкъта, топ, балалар, ойнайлар.
4. Чорап, огренди, орьмеге, Зера.
5. Яптым, ресимиини, мен, мышыгъымнынъ.
6. Салкъын, суву, къуюнынъ, ве, лезетли.



1. Муптеда ве хаберниң астыны сызынызыз. Устьлерине суалини язынызыз.
2. **Чорап** сёзюниң схемасыны япынызыз.

35-мешгъулиет. Шириңи бир къач кере окъунъызыз. Шириңиң насыл истеги бар?

Япалакълап къар ягъсын.
Номай олсун берекет.
Балачыкълар ойнасын,
Бахтчюн тынчлыкъ тек керек.

Л.Сулейман



1. Акълынъызда тутып, дефтеринъизге язынъыз.
2. Муптеданы тапып, астыны бир сыйыкънен сыйынъыз.

36-мешгъулиет. Окъунъыз. Бу парча къайсы ма-
салдан алынгъан?

Къашкъыр балыкъны ашагъан соңъ:
— Достум, бир балыкъ даа берсе, — дей
тилькиге.
— Бар, озюнъ тут да, аша, — джевап бере
тильки.
— Я балыкъ насыл тутула? — сорай къаш-
къыр.
Тильки къашкъырдан къуртуулмакъ ичюн бой-
ле дей:
— Озенге бар. Бузны теш де, къуйругъынъ-
ны сувгъя йибер. Балыкълар онъа сарылыр. Ана
шу вакъыт къуйругъынъны чекерсинъ де, ба-
лыкъларны чыкъарырсынъ.
Ахмакъ къашкъыр ойле де япа.





1. Къашкъыр тилькиге не дей?
2. Тильки онъа насыл джевап бере?
3. Къашкъыр тилькиден не сорай?
4. Тильки къашкъырдан къуртулмакъ ичюн не дей?
5. Къашкъыр тилькиниң айтқъанларыны яптымы? Масалны девам этинъиз.



37-мешгъулиет. Наджие Аметованың «Эгиз къозулар» икяесинден 5 джумле тапып, дефтеринъизге язып алынъыз. Мунтеда ве хабернинъ астыны сыйынъыз.

Окъув

Эрдживан Керменчили

Бааръ мөвсими

Ах, не къадар гузель мөвсим
Тереклер гуль ачкъанда,
Къайтып кельген йырджы къушлар
Сюрюлернен учкъанда.



Ачыкъ мавы кок юзюнде
Нурлу кунеш ышыгъы,
Озъ-озюне бу манзара
Табиат ярашыгъы.

Джыллы, хафиф ельчик эсе,
Бу — баарьниң нефеси.
Табиатны безендире
Бульбуллernerниң хош сеси.



1. Шиирни ифадели окъунъыз.
2. Шаир табиатның гузеллигини насыл сёзлернен тасвирлей? Шиирден тапып окъунъыз.
3. Баарь мевсими къайсы айдан баштай?
4. Шиирдеки сёзлерге эсасланып, баарь мевзусында икяечик язынъыз. Икяени бойле башланъыз: *Баарь — гузель мевсим*.



- сюрю — за текстом: зграй
- ышыкъ — за текстом: тепло
- манзара — за змістом: видовище
- хафиф ельчик — легкий вітерець
- безендире — прикрашає

Къырымтатар тили

Джумленинъ экинджи дередже азалары

38-мешгъулиет. Окъунъыз. Серлева къюнъыз.

Биз Керичъ маден заводына **бардыкъ**. Маден заводы пек буюк. Теджрибели маденджи **Бекир агъа** бизге бутюн цехлерни **косътерди**. Бекир агъа бизге заводның тарихыны икяе этти. **Биз** оны дикъкъатнен **динъледик**.

Меракълы икяе ичюн тешеккюрлер бильдирдик. Бекир агъанен сагълықлашып, эвлери мизге къайттыкъ.



1. Метинни дефтеринъизге язып алынъыз.
2. Къайд этильген сёзлерниң устюне суаллерини язынъыз. Бу сёзлер джумледе не ола?

Джумледе муптеда ве хаберден гъайры башкъа сёзлер де бар. Бу сёзлерге **джумленинъ экинджи дередже азалары** дейлер.

Ме с е л я: Биз дерсте диктант яздыкъ.

Алие диктантны яхшы язды.

39-мешгъулиет. Метинни окъунъыз.



Рессамлар сергиси

Биз къырымтатар рессамларының сергисине бардыкъ. Анда адтайип ресимлер коръдик. Мен къырым манзарасыны тасвирлеген ресимлерни пек бегендим.

Сергиде биз рессамларнен таныш олдыкъ.
Рессамларның масалларгъа япқын ресимлери
бизни меракъландырыды. Олар ренкли, дюльбер
ве джанлы киби эди.

Биз сергиден яхши тәэссуратларнен
къайттыкъ.



1. Балалар къайда барды?
2. Олар сергиде не корыдилер?
3. Къайсы ресимлер оларны меракъландырыды?
4. Метинге эсасланып, джевапларны дефтеринъизге
язынъыз.
5. Джумлелерде баш ве экиндже дередже азаларының
астыны сыйынъыз.
6. Берильген ресим къайсы масалгъа аит?
7. Масалны хатырланызыз ве икяе этинъиз.

40-мешгъулиет. Джумлелерни дефтеринъизге
кочюрип язынъыз.

1. Саба балалар Багъчасарай шеэрине экскурсиягъа кетеджеклер. 2. Кок юзюни булутлар
къаплады. 3. Мен тар ве айланчыкъ сокъакътан кетем. 4. Йылбаш байрамына битам кобете
пиширди.



1. Муптеданы бир сыйыкънен, хаберни эки сыйыкънен,
экиндже дередже азаларыны исе далғыалы сыйыкънен
къайд этинъиз.
2. Дёртюнджи джумленинъ схемасыны япынъыз.

41-мешгъулиет. Джумлелерни окъунъыз. Эр бир
джумледе муптеда ве хаберни къайд этинъиз.

1. Фатиме тике. 2. Решат яза. 3. Анам пиширди.
4. Тавшан сыйрай. 5. Тюркю эшитиле.



Джумлелерге экиндже дередже азаларыны нумюне
боюнчада къошып язынъыз.

Нумюне: Фатиме анасына оглюк тике.

Ярдымджы сёзлер: анасына оглюк, доступна мектюп,
лезетли аш, чөльде, узакъта шенъ.



42-мешгъулиет. Шиирни ифадели окъуньыз.

Тышта боран. Эвде сыйджакъ.
Не яхши соба якъмакъ!
Пенджерени буз къаплады,
Энди о ола япракъ.
Буз япракълар ешиль дегиль,
Олар къар киби ап-акъ.

A. Сеногъул



1. Шиирден **не?** суалине джевал берген сёзлерни язып алынъыз. Бу сёзлернен джумлелер уйдурып язынъыз.
2. Джумлелерде баш ве экинджи дередже азаларының астыны сыйынъыз.

Окъув

Субхи Валиев

Къарылгъач кельди

Къарылгъач кельди,
Баарь кельди,
Эвимиз кульди, шадландыкъ.
Къарылгъач кельди,
Селям кельди,
Баарьлик ишке атландыкъ.

Юванъны
Сен кельгендже
Сакъладыкъ биз, къарылгъач.
Яша, къуван
Кузъ кельгендже,
Сонъ ёлунъа къанат ач.



Гъафар Булгъанакълы

Софамызының сачагъында
Юва япқын бир къарылгъач.
Афта бою уча-къона,
Анълашыла: юрткъа мухтадж.

Бу юванынъ устю ачыкъ,
«Диварлары» кемер-кемер.
Уста экен къарылгъаччыкъ,
Бакъ, чёкючи недай чебер.



1. Шиирлерни окъунызыз.
2. Къарылгъачлар не вакъыт учып келелер?
3. Баарь кельген соңы не ола? Шиирлернинъ мундери-джесине эсасланып, икяе уйдурынызыз ве дефтеринъ-изге 4 — 5 джумле язынъыз.
4. Экиндже шиирде къарылгъач акъкъында не айтыла? Къарылгъачлар акъкъында бильгенинъизни икяе этинъиз.
5. Бегенген шиирни эзберленъыз.



- шенълик — веселощі, радість
- шадландыкъ — за текстом: зраділи.
- атландыкъ — за текстом: приступили до роботи
- юрткъа мухтадж — за змістом: без батьківщини

Джумледе сёзлернинъ бири-биринен багъы

43-мешгъулиет. Окъунъыз.

Сулейман агъа (къайда?) ... (не?) ... къа-
заджакъ олды. Онъа (неге?) ... (кимлер?) ... кель-
ди. Къюдан (насыл?) ... сув чыкъты. Олар къую
этрафына (не?) ... тёктилер.



1. Нокъталар ерине ярдымджы сёзлерден манаджа
келишкенини къюнъыз.

Ярдымджы сёзлер: азбарында, къомшулар,
чакъыл, ярдымгъа, къую, салкъын ве лезетли.

2. Джумлелерни дефтеринъизге язынъыз. Баш ве экин-
дже дередже азаларыны бельгиленъиз.

Буны билинъиз!

Сёзлер джумледе манаджа багъланалар.
Бири-биринен багълы олгъан сёзлерни тапмакъ
ичюн бир сёзден башкъа сёзге суаль къоймакъ
керек.

44-мешгъулиет. Шиирни окъунъыз.

Еллэр ойнай ве къарчыкълар
Авелене авада.
Ель сызгъыра ве ташчыкълар
Чаттай чилле аязда.

Ю. Къандым



1. Бу шиирде къач джумле бар? Джумлелерде суаль
ярдымынен муптеда ве хаберни тапып, дефтери-
нъизге язып алынъыз.
2. Берильген сёзлерге манаджа келишкен сёзни язы-
нъыз: Авелене (къайда?) ... ; Чаттай (не вакъыт?)

45-мешгъулиет. Суаллер ярдымынен джумлелер уйдурып язынъыз.

ким? къайда? не япа?

Нумюне: Мавиле багъчада чалыша.

1. Ким? не? не япты?
2. Кимлер? не ерге? не япаджакъ?
3. Къайда? не? не япа?

46-мешгъулиет. Хатырланъыз.

Буюк арифнен башлана, сонъунда нокъта къююла, там фикирни бильдире, бир я да бир къач сёзден тизиле. Бу не?



Джевабыны тапкъан соң, къайсы тарафта джумлелер ерлешкенини айтынъыз. Фикринъизни тасдикъланыңыз.

- | | |
|----------------------|---------------------|
| 1. Къыш. | 1. Мектепке ашыкъя. |
| 2. Балалар ойнайлар. | 2. Шенъ кулелер. |
| 3. Тенеффюс битти. | 3. Ешиль япракъ. |

Джумлелерни дефтеринъизге язып алынъыз. Муптеда ве хабернинъ астыны сыйынъыз.

Буны билинъиз!

Муптеда ве хабер — бу джумле. Базыда джумледе тек муптеда, я да тек хабер ола.

Меселя: Саба. Мектепке азырланам.

47-мешгъулиет. Берильген сёзлерден джумлелер тизинъиз. Дефтеринъизге язынъыз.

- а) Азырлана, сансар, къышкъя.
- б) Сувукъ, къышта, уфюре, еллер.

Нокъталар ерине келишкен сёзни язынъыз.

Сансар (не япа?) ...; азырлана (неге?)

Еллер (не япа?) ...; уфюре (не вакъыт?) ... ;
еллер (насыл?)





48-мешгъулиет. Джумлелерни окъунъыз. Манаджа багълы олгъан сёзлерни суаллер къойып, язып алынъыз.

Нумюне:

Бабам устаханеде чалыша.

Бабам (не япа?) чалыша; чалыша (къайда?) устаханеде.

1. Рефат достларынен топ ойнай.

2. Мен диктантны яхшы яздым.

3. Коюмизде балабан тюкян ачылды.

Окъув

Гульнара Умерова

Орман бахшыши

Назифе ве онынъ къардаши Рустемчик баарь куньлеринден бириnde койде яшагъан къартаналарына мусафирликке кельдилер. Раиме къартана яшагъан койнинъ чевре-чети юксек дагъларнен, орманларнен сарылы. Назифенен Рустем эртеси куню орманны сейир этмеге чыкътылар. Олар орман ичинде чапып-чапкъалап юръген соң Назифе Рустемге:

— Кадям, айды сакъланчыкъ ойнайыкъ, — деди.

Къардаши разы олды. Назифе саймагъа башлады:

Беяз къушчыкъ,
Къара къушчыкъ.
Мен къалайым —
Сен чыкъ.



Назифенинъ озю чыкъты, Рустемчик исе аптесини тапмакъ керек эди.

— Сен онгъадже сай, мен сакъланайым, — деди Назифе Рустемчикке.

Рустем юксек терек тюбюне барып аркъасыны чевирди ве козълерини эллеринен къапатты да:

— Бир, эки, учь... — деп, онгъадже сайды, соң артына айланып бакъты. Орталыкъ чымчырт. Рустемчик къарт чам терегине таба адымлады. Лякин онынъ артында кимсе ёкъ эди. Къаршыдаки чам терегини коръди ве яваш-яваш онъя тараф кетти. Терекке бираз якъын кельгенде андан насылдыр къоркъунчлы бир давуш эшитильди. Рустемчик шашмалады.

— Апте! Апте, мен артыкъ ойнамайым! — деп ағъламсырады.

Шу вакъыт чалылар артындан Назифенинъ:

— Рустем, мында кель! — деген сесини эшиитти.

Рустемчик къуванчнен аптесининъ янына барды. Назифе къолунда ком-кок бир къоянчыкъ тутып тура эди. Онынъ кырымызы козьчиклери джылпы-джылпы бакъалар.

— Рустем, неден къоркътынъ? — деп сорады Назифе.

— Анда копек улуды! — деди Рустемчик.

— Бу ерлерде копек ёкътыр. Давуш чыкъаргъан пугъу къушу олса керек.

Рустем аптесининъ сёзюни эшитип, бираз тынчлангъан киби олды ве:

— Бу къоянчыкъны къайдан таптынъ? — деп сорады.

— Мен сакъланмакъ ичюн чапып кеткенде, козюме томалакъ бир шей чалынды. Онъа якъынлашсам, къоянчыкъ экен. О да мени коръди, лякин къачмады. Аячыгъы яралангъан, шунынъ ичюн къачмаса керек.

— Аpte, къоянчыкънынъ аягъы тюзелирми? — деп сорады Рустемчик.

— Эльбет, тюзелир. Биз шимди оны сепетимизге къойып, эвге алып кетермиз. Тедавийлермиз, — деди Назифе.

— Аячыгъыны багълармыз, ашамагъа да бир шейлер берирмиз, — деп кулюмсиреди Рустемчик аптесининъ фикирини девам этерек.

Аpte-къардаш эвге дөгъру ёл алдылар.

Райме къартана торунларыны азбар къапусы янында беклеп отура эди. Рустемчик къартанасыны коръгенинен:

— Къартана, орман бизге буюк бахыш берди! — деди къуванчнен. — Биз къоянчыкъ таптыкъ, амма аячыгъы агъыра!

— Эвге алып кириңиз, яралы аячыгъыны багълайыкъ. Тюзельген сонъ, бельки, бизнен къалыр, — деди Райме къартана.

Арадан бир къач кунь кечти. Балалар къоянчыкъны яхшы бакътылар. Онъа эр кунь тазе отлар ташып турдылар. Аячыгъы да яваш-яваш тюзельди. Ода ичинде о якътан бу якъкъа чапкъалап башлады. Бир кунь саба Рустемчик къоянчыкъ гъайып олгъаныны корип, феръяд-фигъан къопарды. Къартанаасынен аптеси ондан:

— Рустем, не ичюн агълайсынъ? — деп сорадылар. Рустемчик элинен къоянчыкъ яшагъан оданы косътерди. Назифе одагъа чапып кирди. Арадан чокъ вакъыт кечмеден андан:

— Къартана, къоянчыкъ къачкъан! — деген эеджанлы сес эшитильди. Буны эшиткен Рустемчик даа фена агълай башлады. Раиме къартана бираз сусты, соңра деди:

— Рустем, не ичюн агълайсынъ? Я сен Назифе, не ичюн кусытинъ. Къоянчыкъ къачкъан, демек, аячыгъы тюзельген. Сизлер киби яхшы, эдепли балаларнен таныш олгъаныны ормангъа барып, озь анасына макътанаджагъы кельген.



Бельки, о кене бизге мусафирликке келир. Я да энди келедир.

Балалар къартаналарының лафыны эшиткен соңъ, эпейи вакъыт тюшюнип турдылар. Соңра Назифе Рустемчикке: — Кадым, юрь орман тарафкъа, — деди, — къоянчыкъыны къаршылайыкъ.

Рустемчикнен Назифе эль тутушып, орман тарафкъа чапып кеттилер.



1. Назифенен Рустемчик кимге мусафирликке кельдилер?
2. Раиме къартана яшагъан кой насыл эди?
3. Балалар орманда чапкъалап юргенде не олды? Бу акъта метинден парчаны тапынъыз ве ифадели окъунъыз.
4. Раиме къартанай ве балачыкълар къоянчыкъыны насыл этип бакътылар?
5. Къоянчыкъының аягъы түзөльген соңъ не олды? Икяени девам этинъиз.
6. Не ичюн муэллиф икяенинъ адыны «Орман бахшышы» деп къойгъан?
7. Я сиз бу икяеге насыл серлева даа къояр эдинъиз? Тюшюнип бакъынъыз ве озь фикирлеринъизни айтынъыз. Серлевагъа ресим япынъыз.



- сакъланчыкъ — гра: скованки
- улумакъ — вити
- пугъу къушу — пугач, сова
- феръяд-фигъан — истерика
- фена (агълай) — за текстом: сильно (заплакав)
- кусьмек — обращаться

Сёз бирикмеси. Баш ве таби сёз

49-мешгъулиет. Берильген сёзлерден джумлелер тизинъиз. Дефтеринъизге язынъыз.

1. Мени, достум, чагъырды, мусафирликке;
2. Чибеклер, тавада, чырылдай.



Джумлелерден манаджа багълы олгъан сёзлерни суаллар къойып, язып алынъыз.

Буны билинъиз!

Эки ве экиден зияде сёз къошулмасына **сёз бирикмеси** дейлер. Сёз бирикмелери **баш** ве **таби сёзлерден** ибарет. Таби сёз баш сёзнен манаджа багълана. Баш сёзден таби сёзге суаль къюла:

къайды? насыл?
↓ ↓
mektepke ketmek, eшиль байракъ

Сёз бирикмесинде баш сёз бойле ишаретнен (**x**) къайды этиле.

50-мешгъулиет. Сёз бирикмелерини окъунъыз. Баш сёзден таби сёзге суаль къюнъыз.

нени?
↓ ↓
Нумюне: икяени окъумакъ

x x x
Таби сёз, оджаны хайырламакъ, тазе ава,
x x
аджайип чечеклер, дерске кельмек.



Сёз бирикмелерини дефтеринъизге язынъыз.

51-мешгъулиет. Метинни окъунъыз.

Аметхан достларынен **дагъга барды**. Балалар баягъы ёл юрьген соң чамлыкъ дагъына келип чыкътылар. Мында къалын ве юксек чам тереклери осе. Чам тереклерининъ тюбюнде пек чокъ **къуругъан къарпасиналар** дагъылып ята. Балалар якъарлыкъ ичюн шу къуругъан **карпасиналарны топладылар**. Оларны **чувалларгъа толдурдылар** ве эвге таба ёл алдылар.



1. Аметхан достларынен къайда барды?
2. Балалар не ерге келип чыкътылар?
3. Чам тереклерининъ тюбюнде нелер дагъылып ята эди?
4. Балалар не ичюн къуругъан карпасиналарны топладылар?
5. Къайд этильген сёз бирикмелерини дефтеринъизге язынъыз. Баш сёзден таби сёзге суаль къюнъыз.

52-мешгъулиет. Джумлелерни окъунъыз.

1. Сайме алам **хастаханеде чалыша**.
2. Садыкъ **китапханеге барды**.
3. **Къара булут** ягъмур кетире.
4. Решид агъа **мусафирликке кельди**.



1. Джумлелерни дефтеринъизге кочюрип язынъыз.
2. Муптеда ве хабернинъ астыны сыйынъыз.
3. Къайд этильген сёз бирикмелерини язып алынъыз.
4. Баш сёзден таби сёзге суаль къюнъыз.



53-мешгъулиет. Нокъталар ерине келишкен сёзлерни къойып, сёз бирикмелерини тизинъиз. Дефтеринъизге язынъыз.

- насыл? къайдан? ненинъ? не?
↓ ↓ ↓ ↓
... чипче, ... чыкъмакъ, ... къанаты, ... язмакъ,
- насыл? кимнинъ? не вакъыт?
↓ ↓ ↓ ↓
... китап, ... къалпагъы, ... кельмек.

Энвер Къафадар



Баарь ягъмуры

Кок юзю буулутланды,
Ерге ягъмур тамчылай.
Буулутлар эп алчакъланды,
Кок гудюрдей-шатырдай.

Козълеринъни къамаштыра
Чакъмакъ чакъкъан йылдырым.
Ильни не де яраштыра,
Дейим: «Ягъ, ягъ, ягъмурым!

Ягъмур ягъса багъчаларгъа,
Тогъайларгъа, чёллерге,
Бинъ тешеккюр айтамыз биз
Бол ягъмурлы баарьге.



1. Бу шиирде не акъкъында айтыла?
2. Шаир ягъмурның ягъъаныны насыл этип тасвирлей?
3. Шиирге эсасланып, джумлелерни толдурынъыз ве дефтеринъизге язып алынъыз:

Кок, тамчылай. Буулутлар
Кок ...-.... .



- къамаштырмакъ — засліплювати
- чакъмакъ — кресало, іскра

Адий ве муреккеп джумлелер

54-мешгъулиет. Джумлелерни окъунъыз. Муптеда ве хаберни къайд этинъиз. Эр бир джумледе къач муптеда ве къач хабер бар?

1. Танъ атты.
2. Татам байрам къавеси пиширди.
3. Битам дуа окъуй.
4. Эмджем янъы машина алды.

Буны билинъиз!

Джумлелер **адий** ве **муреккеп** ола.

Бир муптедасы ве бир хабери олгъан джумлеге **адий джумле** дейлер.

55-мешгъулиет. Окъунъыз.

1. Чанъ къакъылды, талебелер сыныфъя толушты.
2. Наджие шишир айтты, Амет исе йырлады.
3. Энвер чокъ бекледи, амма Амет кельмеди.
4. Къапу ачылды ве одагъа мышыкъ чапып кирди.
5. Юксек сельби тереклери коюмизни яраштыра.



1. Джумлелерни дефтеринъизге язып алынъыз, муптеда ве хаберлернинъ астыны сзынъыз.
2. Джумлелерде къач муптеда ве къач хабер бар?

Буны билинъиз!

Эки ве экиден зияде адий джумлелерден ибарет олгъан джумлеге **муреккеп джумле** дейлер. Муреккеп джумлени тешкиль эткен адий джумлелер арасында **виргюль** къюла.

Меселя: Къыш кельди, авалар сувуды.

56-мешгъулиет. Эки адий джумлени къошып, муреккеп джумле япныңыз.

*Нумюне: Дерс битти. Эр кес эвге ашыкъты.
Дерс битти, эр кес эвге ашыкъты.*

1. Мен денъизни севем. Эдие исе дагълар-ны севе.
2. Бабам одун парлай. Мен исе онъя ярдым этем.
3. Биз шеэрде яшаймыз. Лякин мен койни бегенем.

57-мешгъулиет. Муреккеп джумлелерни окъунъыз.

1. Саба эрте турам мен,
Эль-бетимни ювам мен.
2. Кунеш джумерт шавле сача,
Етише бол берекет.
3. Къушчыкъ мине чалашкъя,
Хораз чыкъя бир ташкъя.



1. Бу джумлелер къач адий джумледен ибарет?
2. Оларда къач муптеда ве къач хабер бар?
3. Муреккеп джумлелерде адий джумлелер бири-би-ринден насыл ишаретнен айырылгъан?
4. Джумлелерни дефтеринъизге языныз.

58-мешгъулиет. Джумлелерни окъунъыз.



1. Февзи сютлю чай севе.
 2. Ешиль дагълар коюмизни яраштыра.
 3. Хораз кете авлакъкъя,
Къоян къайта дагълыкъкъя.
1. Джумлелернинъ къайсы бири ашагъыда берильген схемаларгъа келише?
 1. _____, _____.
 2. _____.
 2. Муреккеп джумлени дефтеринъизге язып алынъыз.



59-мешгъулиет. Джумлелерни окъунъыз. Джумлелерде къач муптеда ве къач хабер олгъаныны бельгиленъиз. Бу джумлелер адий я да муреккепми?

1. Акъшам олды, кунеш батты. 2. Спектакль битти, артистлер санагъа чыкъты. 3. Куньлер кече, ай кече. 4. Авалар къыза, къар ирий. 5. Мен йырламагъа севем, къардашым исе — ойнамагъа.



Джумлелерни язып алынъыз. Муптеда ве хабернинъ астыны сыйынъыз.

Окъув

Мерьем Османова

Мераметли инсанлар

Биринджи сыныфта окъугъан Эльмира эр вакъыт япкъаны киби, бугунь де мектептен эвге къайтып кельген сонъ бутон дерслерини япты да, азбаргъа ойнамагъа чыкъты. Эвлерининъ къапусыны къапатып, килитлеген сонъ, анахтарны джоймамакъ макъсадынен йипнен багълап, бойнуна асты. Азбарда исе балалар чокъ, олар ойнай-ойнай ёрулгъан сонъ эвлерине таркъаштылар. Сонъунда Алёна, Асие ве Эльмира къалдылар.

- Мен эвге кетем, — деди Алёна.
- Мен де эвге кетеджегим, я сен не япаджакъсынъ? — деп сорады Асие Эльмирадан.
- Эвимизде ич кимсе ёкъ, — деди къызычыкъ.— Анам иште... Асие, истесенъ, юрь, бизге барайыкъ, бабам Алманиядан балабан ве

дюльбер къокъла йиберди, оны корерсинъ, — теклиф этти Эльмира.

— Юрь, барайыкъ, — бир кереден разы олды Асие.

Олар, эки джарие, Эльмиранынъ эвине кельдилер. Анахтарнен къапуны ачып, ичериге киргендे аякъкъапларыны тышта, къапу огюнде къалдырылар. Эльмира эвдеки къокъланы чыкъарып, Асиеге косътерди.

— Не де гузель къокъла экен, антери дюльбер, козълери мас-мавы, сачлары билек киби къалын ве узун... — макътамагъа башлады Асие. Соң бираз эеджанлангъан киби токъталды да:

— Къокъланъ юреми? — деп сорады.

— Юре, — деди Эльмира.

— Меним бойле къокълам ёкъ, кичкене бир къокълачыгъым бар. О да энди эски, бир къолчыгъы ёкъ.

— Я, сен бабанъа айт, о санъа янъы союны кетирир, — деди Эльмира.



— Меним бабам ёкъ даа, — деди башыны саллап Асие, соң агъламагъа башлады.

— Агълама, Асие, истесенъ мен бу къокъланы санъа багъышларым.

— Я ананъ санъа дарылмазмы? — сорады Асие.

— Ёкъ, дарылмаз. Анам мерхаметли, ачыкъгоньюолли ве яхшы къадын.

— Я бабанъ эшитсе, джаны агъырмазмы? — текрар сорады Асие.

— Ёкъ, джаны агъырмаз. О ойле адам дегиль.

Мемнүон олгъян Асие джариесине, сагъ ол, деди де ве къокъланы алып, эвлерине къайтты.

Акъшам Эльмиранынъ анасы иштен кельген соң, къызычыкъ бир къабаат ишлеген адам киби онынъ янына барып, яваштан ерге чёкти де:

— Аначыгъым, мен къокъламны Асиеге багъышладым, — деди.

— Насыл къокъланы? — сорады анасы.

— Бабам Алманиядан ёллагъян къокъланы даа,— деди Эльмира.

— Вай, балам, — къатып къалды анасы нефеси тутулгъан киби олып,— бойле къокъланы бахшыш бермек олурмы?

— Менде онларнен къокъла бар. Асиеде исе бир дане биле ёкъ экен, барсын о да бир кере меним къокъламнен ойнасын.

— Я не ичюн бабанънынъ ёллагъян бахшышыны бердинъ, башкъа къокъла берсенъ олмай эдими?

— Асие шу къокъланы зияде бегенди,— деди Эльмира.

— Айса, дөгъру япқъансынъ, къызым, дост хатырыны тампакъ эр шейден къыйметлидир. Мектюп язармыз, бабанъ санъа кене бирини даа ёллар, — деди Эльмиранынъ сачларыны сыйгап анасы.



1. Эльмира мектептен кельген соң не япты?
2. Азбарда кимлер къалды?
3. Эльмира Асиеге не теклиф этти?
4. Асие Эльмираның эвинде нени бегенди?
5. «**Дост хатырыны тапмакъ эр шейден къыйметли-дир**» сөздерини ким айтты? Эльмира ве оның анасы насыл инсанлар?
6. Бу аталар сөздери икяенинъ къайсы къараманларына келише?



Берген эльни эр кес север.

Досттан зарар тиймез.



- Алмания — Німеччина
- таркъашмакъ (диал.) — розійтися
- дарылмакъ — за текстом: сердитися

Кырымтатар тили

СЁЗ

Сёзниң лексик манасы

60-мешгүлиет. Окъунъыз ве хатырланъыз.

Бир де бир шейни бильдирген сёз — оның **лексик манасы** ола.

Меселя: «**къыш**» сёзюниң лексик манасы «**кузъден соң кельген йыл мевсими**».

«**Салы**» сёзюниң лексик манасы «**афтаның экиндже куню (базарэртесинден соң)**».

Сёзниң лексик манасыны **изалама лугъат** ярдымынен тайинлемек мумкун.

61-мешгъулиет. Сырадаки сёзлернинъ умумий адыны язынызыз.

1. Алма, арmut, шефтали, къайсы — мейвалар.
2. Сары, беяз, къырмызы, мавы —
3. Гуль, къаранфиль, пападие, ляле —
4. Чанакъ, къашыкъ, фильджан, табакъ —

62-мешгъулиет. Схемагъа эсасланып, «Мен къырыттар тилинде сёзлернинъ манасы акъкъында не билем» мевзусында малюмат азырланызыз.

Бирманалы сёзлер



Лексик

Синонимлер

(маналары
бир я да
якъын олгъан
сёзлер:
балабан — буюк,
къырмызы — ал)

Эмен —
ири ве къатты
япракълы терек.
Онынъ мейвасы —
пелит фындыгъы.

Антонимлер

(къаршы
маналы
сёзлер:
саба —акъшам,
беяз — къара)

мана

Чокъманалы сёзлер

Ине, тикен, къанат, бурун

63-мешгъулиет. Дерсликниң сонъунда берильген изалама лугъаттан бир къач сёз ве оларның лексик манасыны дефтеринъизге язып алынъыз.



64-мешгъулиет. Окъунъыз. Нокъталар ерине сёзлериңүн умумий адыны тапып, джумлелерни дефтеринъизге язынъыз.

1. Къаз, папий, тавукъ, хораз —
2. Антер, кольмек, биджакъ, фистан —
3. Балта, пычкъы, кельпеден, бургъуч —
4. Баш, къол, аякъ, къурсакъ, къулакъ —

Окъув

Рефат Чайлакъ

Тезден апрель



Тезден апрель, дагъ-къырларда
Мор мелевше ачаджакъ.
Къокъусыны саба танъда
Орталыкъка сачаджакъ.

Тезден апрель, узакълардан
Шенъ бульбуллар келеджек.
Чечек ачкъан багъчаларда
Гедже-куньдюз отеджек.

Тезден апрель, ягъмурлар да
Сагъанакълап ягъаджакъ.
Дерелерден, улукълардан
Ташкъын сувлар акъаджакъ.

Тезден апрель, тарлаларда
Къызгъын ишлер башлайджакъ,
Ильк бааръ ёлакъларын
Челик атлар ачаджакъ.



1. Апрель айында табиатта не оладжакъ? Шиирге эсасланып, айтынъыз.
2. **Челик атлар** бу не демектир?
3. Шиирни котеринки сеснен, ифадели окъунъыз.
 - улукълар — жолоби
 - ташкъын — бурхливий



Къырымтатар тили

Сёзлернинъ догъру ве кочьме манасы

Буны билинъиз!

Сёзлер бир я да бир къач мананы ифаделей билир.

Сёзлернинъ **догъру** ве **кочьме маналары** ола.

Алтын купелер — купелер алтын маденден япылгъян — **догъру мана**. *Алтын эллер* — чебер, эр шей япа бильген эллер — **кочьме мана**.


65-мешгъулиет. Джумлелерни дикъкъатнен окъунъыз.



1. Бабам аджджы бибер севе.
2. Татлы сёз кульдюре, аджджы сёз куйдюре.
1. Одjakъта сув къайнай.
2. Тарлада иш къайнай.

1. Кочьме манада къулланылгъян сёзлерни тапынъыз. Олар насыл сёзлернен манаджа багъланып келелер?
2. Бу сёз бирикмелерини дефтеринъизге язынъыз. Баш ве таби сёзни бельгиленъиз.

66-мешгъулиет. Берильген сёзлернен сёз бирикмeleri тизинъиз, дефтеринъизге язынъыз.



Къайсы бирикмелерде **татлы**, **тутмакъ** сёзлери дөгъру манада, къайсы бирикмелерде исе кочьме манада къулланыла?

67-мешгъулиет. Сёз бирикмелеринен джумлелер тизип, дефтеринъизге язынъыз.

Отъкор пычакъ, отъкор сёз, къара къаве, къара хабер.



- Сёз бирикмелеринин къайсы бири кочьме манада къулланыла?
- Джумлелерде баш азаларынын астыны сыйынъыз.



68-мешгъулиет. Аталар сёзлерини окъунъыз. Маналарыны анълатынъыз.

Татлы сёз демир къапуларны ачар.

Эвинъ тар олса да, гонълюнъ бол олсун.



- Татлы сёз, демир къапу, тар эв, бол гонъюль** бирикмелери дөгъру я да кочьме манада къулланылгъан?
- Аталар сёзлерини дефтеринъизге кочюринъыз.



69-мешгъулиет. Сёз бирикмелерини окъунъыз. Догъру манада къулланылгъан сёз бирикмелерини та-пынъыз. Оларнен джумлелер уйдурып, дефтеринъизге язынъыз.

Агъыр чанта, алтын кузъ, узун ёл, узун омюор, агъыр куньлер, алтын юзюк, агъыр вазифе.

Субхи Валиев

Турначыкъ

Апрель айы. Япалакъ-япалакъ къар ягъа.
Бунъа опук къар дениле. Пуф киби йымшакъ
къар, ерге тиер-тиймез, ирип кете. Опук къары
ирип кеткен соңъ, кокте турналар пейда ола-
лар. Балалар кокте учъкоше шеклини алып уч-
къан турналар керванины корип, пек къуваны-
лар. «Турлыйт-турлыйт, турналар!» — деп къычы-
рышалар. Балаларгъа турналарның келюви,
буюк байрам ола. Эр кес озь бильгенини бар
къуветинен къычырып чынълай:

Аджы-мелек турналар
Кок юзюнде ялдайлар.
Чёль устюнде айланып,
Къонакъ бир ер арайлар.

Энъ алдында етемен, —
Ёл корьсетип кетемен,
Учъкошелеп сюрюни
Аскер киби тиземен, —

Деп, гъурурнен багъыра,
Къардашларын чагъыра.
Аджы-мелек турналар
Озь мекянын къыдыра.

Турналар кузъде бир къач керелер кой ус-
тюнде айланып, «Турлыйт-турлыйт» деп къы-
чырышалар, балаларнен ведалашып, ве учъ-
коше сафкъа тизилишип, дженюопке дөгъру учып
кетелер.

Экинджи джиан дженки башланмаздан
дёрт-беш йыл эвельси олып кечкен бир вакъиа-
ны хатырлайым.

Бир яш турначыкъ, не олды бильмем, къанатындан яраланды. О, чалынып алынгъан ашлыкъ занынынъ ичинде, кокке котерильген турналар сюрюси артындан котериледжек олып чекише, секире, къычыра, лякин учып оламай. Турналар бир къач кере онынъ устюнден айланып учкъан соң, турначыкънынъ оларнен учалмайджагыны сезип, етекчиси соңъки кере «турлыйт» деп, эмир этти, ве олар дженюпке ёл алдылар.



Турначыкъ исе багърыны ерге басып, бойнуны узатып, сюрюсининъ артындан бакъып къалды. Онынъ козьлеринде о къадар кедер бар эди ки, буны тариф этмекни имкяны ёкъ! Балалар турначыкънынъ янына чапып баргъанда, онынъ козьчиклериндеки мазюнликни корип, пек аджындылар. Бир ань сустылар, соң бирден эписи гурюльдештилер. Энъ уйкени, Муртаза, турначыкънынъ янына келип, онынъ башыны, аркъасыны сыйпады. Соңра кокюсине басып, эвине алып кетти. Къанатынынъ ярасына тавот якъты, чулнен багълады ве тавукълар, кореллер яткъан кумеске йиберди.

Бир къач куньден сонъ, турначыкъ баягъы тюзельди.

Ашап башлады. Атта оны чагыргъанда, янынъа келе де, къолунъдан отымек алып ашай эди. Бойледже, турначыкъ баарыгедже осъти, балабан олды. Апрель айында опук къары ягъгъан сонъ, о, кокте турналар керванының сесини эшитип, оларгъа таба учып кетти. Озь сюрюсине къошулмаздан эвель, Муртазаларгъа озюнинъ миннетдарлыгъыны бильдирген киби, бир къач кере эв устюнде айланып, сонъра учып кетти.



1. Метинни дикъкъатнен окъунъыз.
2. Балалар турналарның кельгенине насыл къуваналар? Метинден парчаны тапып окъунъыз.
3. Яш турначыкъя не олды? Плангъа эсасланып, икяе этинъиз.

План:

- а) Турначыкъ къанатындан яраланды.
- б) Муртаза турначыкъыны эвге кетирди.
- в) Турначыкъ тюзельди ве учып кетти.
- г) Турначыкъ Муртазагъа миннетдарлыгъыны бильдирди.



- учъкошө — трикутник
- ведалашмакъ — прощатися

Къырымтатар тили

Омонимлер

70-мешгъулиет. Джумлелерни окъунъыз.

1. Япракъта ешиль **бакъа**
Къакъылдап, манъа **бакъа**.

2. Саба эвден эрте **чыкъ**,
Орталыкъта йылтырай **чыкъ**.



Къайд этильген сёзлерниң маналарыны аньлатынызы.

Къырымтатар тилинде айтылуы ве язылуы бир, амма маналары бам-башкъа олгъан сёзлер бар. Бойле сёзлерге **омонимлер** дейлер.

Оларның маналарыны тек джумле ичинде аньламакъ мумкун.

*Меселя: Бааръден сонъ **яз** келе.
Алиме, манъа мектюп **яз**.*

71-мешгъулиет. Шиирни ифадели окъуньызы.



Бакъа

Къолгъа къавал алды бакъа
Бакъ-бакъ, бакъ-бакъ, —
Чалды бакъа.
Айгъа бакъа ешиль бакъа,
Ёлгъа бакъа ешиль бакъа,
Булутларгъа бакъа-бакъа,
Козъяшларны тёке бакъа:

— Къуругъан гольде омюр такъыр —
Кайда къачтынъ, башсыз ягъмур?
Къолгъа къавал алды бакъа,
Бакъ-бакъ, бакъ-бакъ агълай бакъа.

H. Умеров



1. Къайсы сёзлернинъ манасыны тек метинден анъла-
макъ мумкун?
2. Бу сёзлерни тапып, эки джумле уйдурып язынъыз.

72-мешгъулиет. Окъунъыз. Джумлелерде **тура** сёзю насыл маналарда къулланылғаныны анъла-
тынъыз.

1. Абдулла саба эрте тура.
2. Достум эр вакъыт айткъан сёзүнде тура.
3. Терек янында ким тура?



Суаль джумлени дефтеринъизге язып алынъыз.

73-мешгъулиет. Джумлелерни дефтеринъизге язынъыз.

1. Сание алам Кезлев шеэринде яшай.
2. Мен эр кунь тюкяндан отьmek алам.
3. Окъув биткен соңъучь айтатиль оладжакъ.
4. Бабам ай ве йылдызлар акъкъында манъа
баягъы меракъылышейлер айтты.



Айтылуви ве язылуви бир олған сёзлерни тапып, астынны
сызынъыз. Оларнынъ маналарыны анълатынъыз.



74-мешгъулиет. Джумлелерни дефтеринъизге язынъыз.

1. Къартбабам къой бакъа.
2. Ат — чыдамлы айван.
3. Китапны рафкъа къой.
4. Гедже мен тюш коръдим.
5. Топны Лейлягъа ат.
6. Мидат, теректен тюш.



Айтылуви ве язылуви бир, амма маналары бам-башкъа
олған сёзлернинъ астыны сызынъыз.

Якъуб Шакир-Али
Мевсим баарь



Баарь киби мевсим олмаз,
Феракъланыр юреклер.
Къыдыр-Ильяс куньлерчюн,
Пиширирлер чёреклер.
Сабанджылар чёльде энди
Топрагъы аль этелер,
Акъшам олса, топлашаракъ,
Йырлай, йырлай кетелер.



1. Бу шиир не акъкъында?
2. «**Къыдыр-Ильяс куньлерчюн, Пиширирлер чёреклер**» сатырларынынъ манасыны анълатынъыз.
3. Шиирни эзберленъыз.



- феракъланмакъ — за текстом: радіти
- мевсим — пора року
- Къыдыр-Ильяс — імена пророків Хидир та Ільяс
- чёрек — вид хліба
- сабанджы — орач

Синонимлер

75-мешгъулиет. Ресимлөргө бакъынъыз.



къол — эль отургъыч — курьсю маса — къона

Маналары бир олгъан сёзлер: къол — эль.

Маналары якъын олгъан сёзлер: курьсю — отургъыч, къона — маса.

Айтылуви ве язылуви башкъа, маналары исе бир я да бири-бирине якъын олгъан сёзлерге **синонимлер** дейлер.

Меселя: бита — къартана,
гузель — дюльбер.

76-мешгъулиет. Джумлелерни окъунъыз.

1. Фатиме Наврез байрамында «Баарь» **тюркюсини** йырлады.
2. Бизим **къорантамыз** шенъ ве муаббет яшай.
3. Меним Земине **къардашым** даа пек кичкене.
4. Къартбабам къызылчыкъ татлысыны пек **севе**.
5. Сабадан пенджереме кунеш **нурлары** ура.



Джумлелерни кочургенде къайд этильген сёзлер ерине маналары якъын олгъан сёзлерни язынызыз.

Ярдымджы сёзлер: аилемиз, йырыны, бегене, кадым, шавлелери.

77-мешгъулиет. Сёзлерни окъунъыз. Синонимлерни нумюне боюнчада язынызыз:

Нумюне: балабан – буюк.

Балабан, беяз, нур, буюк, къырмыскъа, омюр, акъ, давуш, чалышмакъ, шавле, сес, ишлемек, къарынджа, яшайыш.

78-мешгъулиет. Окъунъыз.

Багъчаларда, дагъда, къырда
Чешит къушлар отелер.
Гонъюль охшар назик йырдан,
Хош нагъмелер тёкелер.

P. Муедин



Шиирден берильген сёзлерге синонимлерни тапып язынызыз.

Нумюне: тюрлю – чешит

йырлайлар — ...

юрек — ...

нагъме — ...

Бу не демектир?

Пенджереме кунеш
Къаве къокъусы бурнума
Юрегим тез-тез



ура.



79-мешгъулиет. Окъунъыз. Берильген сёзлердинъ синонимлерини тюшюнип язынызыз.

Ель — ... , ватан — ... , тез — ... , тюс — ... ,
тарташмакъ —



Ель, Ватан сёзлеринен джумлелер уйдурып, дефтеринъизге язынызыз. Джумлелерде муптеда ве хаберни бельгиленъиз.

Сание Саттарова

Мераба, Хыдырлез!



Севимли Ватанымызгъа Хыдырлез байрамы кельди. Бу миллий байрам майыснынъ ильк куньлеринде къайд этиле. Адети узыре, бу байрам табиат къучагъында — бир-де бир алалыкъта, я да дагъ этегинде, чокъракъ янында кечириле.

«Хыдырлез» сёзю эки пейгъамберниң адындан асыл олгъан. Хыдыр адамларны тюрлю мусибетлерден къуртартғъан, Ильяс — чокъракъларны, айванларны къоругъан.

Халкъымыз эвель-әзельден Хыдырлезни шенъ-шерамет кечири. Хыдырлез — бу шенълик, барышыкъ байрамыдыр.

Эв бикелери кунь эвельден къатламалар, пахлавалар, тавалокъум, сарыбурма, чиберек,

кобете, янтықъ, пиляв ве дигер емеклер азырлайлар. Бала-чагъа янъы урбаларыны кийип, байрамгъа ашықъалар.

Дагъ-къырлар, тюземликлер, чименликлер узъре давул-зурна сеслери янъгъырай. Эр кес тувгъан нагъмелер эшитильген тарафкъа ашыкъа. Сокъакълар, ёллар, кестирме ёллар бою адамлар эп келелер. Олар байрам мейданына топланалар. Эр кес эвде азырлап кетирген емеклерини ем-ешиль табиий макъат устюндеки буюктен-буюк софрагъа къоя. Софра эп буюклеше, эп боллаша. Даире-даире олып отургъан адамлар байрам дуасындан соńь, бири-бини софрагъа давет этелер.

Адетимиз шай. Бу адетни ойле де сакълап къалмакъ керек!



1. Метинни дикъкъатнен окъунъыз.
2. **Хыдырлөз** сёзю нени анълата?
3. Эв бикелери, бала-чагъа байрамгъа насыл азырланалар?
4. Байрам мейданында не ола? Метиннинъ соńьки парчасына эсасланып, озъ сёзлеринъизнен айтынъыз.



Метинден емеклернинъ адларыны тапып, дефтеринъизге язынъыз. Емеклернинъ ресимлер япынъыз.



- барышыкъ — мир, злагода
- тюземлик — рівнина
- чименлик — луг, місце проросле молодий травою
- кестирме (ёл) — найкоротша (дорога)
- табиий — природный, натуральный
- макъат — килим
- адет — звичай, традиція

Къырымтатар тили

Антонимлер

80-мешгъулиет. Ресимлөргө бакъынъыз. Суаллөргө джевап беринъыз.



1. Фииль (*насыл?*) ..., я Къарынджа (*насыл?*)



2. Дондурма (*насыл?*) ..., я Къаве (*насыл?*)



Эки сёзнен джумле уйдурып, дефтеринъизге язынъыз.

Маналары къарама-къаршы олгъан
сёзлерге **антонимлер** дейлер.
Меселя: узун – къыскъа, саба – акъшам.

81-мешгъулиет. Аталар сёзлерини окъунъыз. Маналарыны анълатынъыз.



Тенбель ашкъа келир, ишкир — ишке.



Яхшы киши яман сёз айтмаз.

1. Аталар сёзлерини дефтеринъизге язынъыз. Маналары къарама-къаршы олгъан сёзлерни къайд этинъиз.

2. **Аш, киши, яхшы** сёзлерининъ синонимлерини тапып язынъыз.

82-мешгъулиет. Берильген сёзлерниң антонимлерины тапып языңыз.

Кыш — ... , дост — ... , оғлан — ... ;
кульмек — ..., бермек — ... , юқъламакъ — ... ;
енгиль — ..., татлы — ... , йымшакъ —



Енгиль, татлы, йымшакъ сёзлерине манаджа келишкен сёзлерни тапып языңыз.

83-мешгъулиет. Джумлелерни окъуньыз.

1. Мен эвден эрте чыкътым, амма ... къайттым.
2. Къомшумызының копеги беяз, къулакълары исе —
3. Къартбабам тёшегинден яваш турды, мен онъа ... отургъыч кетирдим.
4. Буюклер ... къорчаламакъ кереклер.




Нокъталар ерине келишкен сёзлерни тапып языңыз.

Ярдымджы сёзлер: къара, тез, кичиклерни, кеч.



84-мешгъулиет. Тапмаджаларны окъуньыз.



1. Устю — ешиль, ёлакълы,
Ичи — къызыл ве татлы.
2. Акъшам олса, джайылам,
Саба олса, джайылам.



1. **Устю — ичи, акъшам — саба** сёзлери къарама-къаршы маналы я да бири-бирине якын олгъан сёзлер?
2. Тапмаджаларның джевапларынен джумлелер уйдурып, дефтеринъизге языңыз.

Окъув

Изет Эмиров

Къырымның баари йыр



Не гузель Къырымның баари,
Багъ-багъча гуль-чечек ачкъанда.
Чочамий торгъайлар чырылдал,
Чёллерде эзгилер сачкъанда.

Багълама:

Айдынъыз, балалар, бирликте
Чайырлар, къырларны кезейик.
Мос-мор мелевше, чечектен
Къокъулы гульдесте тизейик.

Бакъынъыз, ем-ешиль орталыкъ,
Кийинген, къушангъан чайырлар.
Тынч сема астында, тогъайда
Гуль топлай бахтияр балалар.

Багълама.

Тарлалар ем-ешиль кийинген,
Секире къозулар эректе.
Не назлы нагъмелер тёкелер,
Бульбуллар сув бою, теректе.

Багълама.




1. Бу йырда не акъкында айтыла?
2. Муэллиф балаларны къайда чагъыра?
3. Йырны огрединъиз.

Къырымтатар тили

СЁЗ ТЕРКИБИ

Сёзниң тамыры. Тамырдаш сёзлер

85-мешгъулиет. Метинни окъунъыз.



Къырымда чокъ янъы койлер бар. Ойле бир **кой** Акъмесджит шеэрининъ янында къурулды. Бу **койни** бизим ватандашларымыз къурды. Эр бир **койлю** озъ азбарында фиданлар отуртты, чечеклер сачты.

Койнинъ ортасында джами къурулды.



1. Къайд этильген сёзлерни язып алынъыз. Сёзлерниң умумий къысымларыны бельгиленъиз.
2. Сёзлерниң умумий къысмына не дейлер?
3. Ресимге бакъып, бир къач джумле уйдурынъыз.
4. Ресимниң мевзусы метинге уйгъунмы?
5. Ресимге серлева къоюнъыз.

86-мешгъулиет. Сёзлерни окъунъыз.

а) мектеп	б) багъ	в) джами
мектеплер	багъджы	джамиде
мектепте	багълар	джамиден
мектептен	багъда	джамилер
мектепке	багъныň	джамиинъ



Дефтеринъизге язып алынъыз. Сёзлерниң тамырыны нумюне боюнчада къайд этинъиз.

Нумюне: мектеп, мектеплер.

Тамыр — сёзниң болюнмеген къысмы.

Оның озы башына манасы бар.

Бир тамырдан япылгъан сёзлерге **тамырдаш сёзлер** дейлер.

Тамыр языда бойле къайд этиле.

Меселя:

невбет — невбетчи — невбетчилик.

87-мешгъулиет. Тамырдаш сёзлерни нумюне боюнчада язып алынъыз. Сёзлерде тамырны къайд этинъиз.

Нумюне: бал, балджы;

Масал, тузлу, сабунламакъ, балыкъчы, туз, сабун, юзюмджи, ягъмурлы, ягъмур, балыкъ, юзюм, сабунлы, масалджы, тузлукъ, сабунлыкъ, ягъмурлыкъ.

88-мешгъулиет. Берильген сёзлерге тамырдаш сёзлер тюшюнип язынызыз. Тамырны къайд этинъиз.

Нумюне: *Къабакъ – къабакълы*,

Аш, шекер, демир, одун, дерс, денъиз, бакъла, оюн.

89-мешгъулиет. Берильген сёзлер тамырдаш сёзлер олгъаныны исбатланызыз.

Туз — тузлукъ, сют — сютлюк, йыр — йырджы, кемане — кеманеджи.

Бойле фикир юрьсетинъиз: Туз ве тузлукъ сёзлерининъ умумий къысмы — туз.

Туз ве тузлукъ сёзлерининъ маналарында умумийлик бар: **тузлукъ** — бу **туз** къоулгъан савут. Онынъ ичюн **туз ве тузлукъ** сёзлери тамырдаш сёзлер ола.

90-мешгъулиет. Метинни окъунызыз.



Язда биз **эвимизни** тамирледик. Бабам түкндан киреч, чёткю, мавы ве беяз боя кетирди. Башта **эвнинъ** диварларыны сыладыкъ. Соң бабам къапу ве пенджерелерни беяз боянен боялады. Мен китап рафчыгъымны мавы боянен бояладым. Къартанам боялангъан рафчыкъыны бегенди.

Тамир ишлерinden соң **эвимиз** даа да гузель олды.



1. Къайд этильген сёзлерни дефтеринъизге язып алышыз, тамырны къайд этинъиз.
2. Метинден **тамир, боя** сёзлерине тамырдаш сёзлерни тапып язынызыз.

Окъув

Койлю ве тильки масал



Авджылар бир къашкъыр пешине тюшелер.
Къашкъыр къача-къача аланлыкта чалышкъян
бир койлюге расткеле ве:

— Джаным агъа, мени сакъланъыз! Артым-
дан авджылар къувалар, — деп ялвара.

Койлю къашкъырны аджый ве элиндеки
чувалнынъ агъзыны ача да:

— Мына бу чувалгъа кир, сени олар тапа-
мазлар, — дей.

Къашкъыр деръал чувалгъа кире ве онынъ
ичинде сес-солукъ чыкъармай ята. Шу вакъыт
авджылар да етип келелер. Олар койлюдөн:

— Къашкъырны корьмедиңми? — деп
сорайлар.

— Ёкъ, корьмедим, — дей койлю.

Авджылар кеткен соńь, къашкъыр чувалдан чыкъа да, озъ миннетдарлыгъыны бильдирмек ерине, койлюге уджюм этеджек ола. Койлю буны анълап, бираз абдырай. Шу арада оларнынъ янында тильки пейда ола ве:

— Не олды, я? — деп сорай койлюден.

— Мен къашкъырны чувалгъа сакълап, олюмден къуртардым. О исе мени ашайджакъ ола.

— Мен бунъа аслы да инанмайым, — дей тильки. — Бу къадар балабан къашкъыр бойле чувалчыкъка сыгъармы?

— Инанмасанъ, онынъ озюндөн сора, — дей койлю.

Тильки къашкъыргъа чевирилип:

— Эй, къашкъыр агъа, сиз шу чувалчыкъка кирип сакъландынъызмы?

— Эбет! — дей къашкъыр.

— Ёкъ, сиз мени алдатып олмазсынъыз. Эгер керчектен де шай олгъан олса, кене чувалгъа киринъиз бакъайым, — дей тильки.

— Мына, бакъ! — дей къопайчора къашкъыр, ве текрас чувалгъа сокъула. Шу ань тильки койлюнен берабер чувалнынъ агъзыны багълап, озенге ташлайлар.



1. Не ичюн койлю къашкъырны чувалгъа сакълай?
2. Авджылар кеткен соńь, къашкъыр озюни насыл алып бара?
3. Тильки койлюни къашкъырдан насыл этип къуртара?
4. Масалны роллерге болип окъунъыз.



- деръал — негайно, зараз же
- миннетдарлыкъ бильдирмек — висловлювати подяку
- къопайчора — хвалько

Ялгъама (аффикс)

Сёзниң тамырына къошулгъан къысымгъа **ялгъама** дейлер.

Ялгъама озы башына мана аньлатмаз.



Языда ялгъама бойле \wedge къайд этиле.

Меселя: *араба – арабаджы,*

кунеш – кунешли.

91-мешгъулиет. Берильген сёзлерге ялгъамалар къошып язынызыз. Умумий къысымны къайд этинъиз.

Нумюне: *иш – ишчи, иште,*



92-мешгъулиет. Окъунъыз. Метинге серлева къюнъыз.

Тюневин **Зульфиенинъ** дөгъгъан куню олды. Сой-соплары ве достлары **Зульфиени** хайырладылар. Алие досту онъа къанфет ве чечеклер багъышлады.

Анасы **Зульфиеге** меракълы **китап** багъышлады. **Китапта** чокъ икяе ве масаллар бар. **Китапнынъ** саифелери ренкли ве дюльбер ресимлернен безетильген.

Зульфие анасы багъышлагъан китапны пек бегенди. Бу **китаптан** кирпи акъкъында масалны окъуп, Асан къардашына айтты.



1. Метинге эсасланып, Зульфиеге анасы багышлагъян китап акъкъында икяе этинъиз.
2. Къайд этильген сёзлерни язып алынъыз. Тамыр ве ялгъамаларны къайд этинъиз.
3. Я сизинъ дөгъгъан кунюнъиз насыл кече? «Дөгъгъан кунюм» серлевалы икяе язынъыз.

93-мешгъулиет. Нокъталар ерине келишкен ялгъамаларны тюшюнип язынъыз.

Бахт.., бибер.., топракъ.., япракъ.., тавукъ.., сют.., къыш.., дагъ.., ёлакъ.., чипче.., къопкъа.. .

94-мешгъулиет. Сёзлерге келишкен ялгъамаларны къошып, дефтеринъизге язынъыз.

a) -чи, -чы	b) -джи, -джы
аш...	кемане...
балыкъ...	тербие...
куреш...	язы...
невбет..	давул...



Учь сёзнен джумлелер уйдурынъыз.

95-мешгъулиет. Окъунъыз.



Хош кельдинъ, азиз **достум**,
Къана, отур **миндерге**.
Адетимиз боюнджа,
Буюр бизим **къавеге**.

Шекерликте шекерим,
Къара къаве чекерим.
Лезетине тоймайып,
Ютум-ютум ичерим.

P. Ахтемов, Ф. Алиев



1. Шиирде насыл гузель адетимиз акъкъында айтыла?
2. Биринджи бейитни дефтеринъизге язынъыз.
3. Къайд этильген сёзлерниң тамыр ве ялгъамаларны бельгиленъиз.
4. Экинджи бейитте тамырдаш сёзлерни тапынъыз.

96-мешгъулиет. Берильген сёзлерге келишкен ялгъамаларны къошып язынъыз.

Сыныф..., бостан..., къатыкъ..., джевиз..., къаймакъ..., акъыл..., дагъ..., аякъкъап....



Эки сёзнен джумлелер тюшюнип язынъыз.



97-мешгъулиет. Нокъталар ерине келишкен сёзлерни язынъыз.

1. ... багъны асрай.
2. ... балыкъ тута.
3. ... фурунда отымек пишире.
4. ... кеманеде чала.
5. ... демирни дёге.

Ярдымджы сёзлер: кеманеджи, багъджы, демирджи, балыкъчы, фурунджы.



Тамырдаш сёзлерниң тамыр ве ялгъамаларыны бельгиленъиз.

Окъув

Лев Толстой

Къартал

Къартал деньизден узакъ, буюк бир ёлнынъ четинде, терек устюнде, озюне юва ясап, бала чыкъарды.

Бир кунь терекниң тюбюнде адамлар чалышкъанда, къартал, панджасында буюк бир балыкънен, ювасына учып кельди. Адамлар балыкъны корип, терекни сарып, багъырмагъа ве къарталгъа таш атмагъа башладылар.



Къартал панджасындаки балыкъны тюшюрди, адамлар исе балыкъны алып кеттилер. Къартал юванынъ четине къонды. Онынъ балачыкълары, башларыны котерип, чыйылдамагъа башладылар: олар аш истей эдилер.

Къартал ёрулгъан ве текrar денъизге учмагъа такъаты къалмагъан эди. О, къанатларынен балачыкъларыны орьтип, оларны охшады, тюклерини тюзетти, дерсинъ, текяран сабыр этинъиз деп, ялвара эди. Лякин къартал оларны охшагъан сайын, балачыкълары даа зияде чыйылдаша эдилер.

Къартал оларнынъ янындан учып кетип, терекнинъ энъ юксек далына къонды. Къартал балачыкълары даа зияде аджыныкълы чивильдешти ве чыйылдаштылар.

Бу вакыт къарталның озю де бирден яман-яман багъырды, къанатларыны джайды ве агъырдан дөнъизге дөгъру учты. О тап акъшам, кеч вакытта, учып кельди. О яваштан ве алчакътан уча эди. Оның панджасында кене де буюк бир балықь бар эди.

О, терекке якъынлашкъанда, адамлар ёкъмы экен деп, этрафкъа козь ташлады ве къанатларыны тез-тез топлап, юваның четине къонды.

Къартал балачыкълары башларыны къалдырып, агъызларыны ачтылар, къартал исе балыкъны парча-парча этип балачыкъларыны тойдурды.

- 
1. Къартал ювасына ненен учып кельди?
 2. Адамлар балыкъны не яптылар?
 3. Къартал балачыкълары не ичюн чыйылдаша эдилер?
 4. Къартал балачыкъларыны насыл тойдурды? Бу акъта метинден парчаны тапынъыз ве текрап оқыунъыз.



Китаплардан къарталлар акъкъында малюмат топланызыз. Янъы малюматтарнен сыныфта пайлашынъыз. «Къарталлар — магъур күушлар» мевзузында ресим сергисини тешкиль этинъиз.



- къартал — орел
- панджа — лата
- чыйылдамакъ — пищати
- ялвармакъ — благати
- охшамакъ — пестити
- аджыныкълы — жалібно

Ялгъама (девамы)


98-мешгъулиет. Метинни динъленъиз.

Саз

Саз — пек узакъ девирлерден къалгъан чалгъы алети.

Сазның корюниши армуткъа бенъзей. О, джевиз я да дут агъачындан япила. Сазның эки чифт тели бар. Сазджы вишне терегининъ къабугъындан япылгъан тырначыкънен теллерге урып чала.

Эвель заманларда саз усталары шеэр ве койлерни кезип, саз чалып, йырлай эдилер.



1. Догъру джевапны къайд этинъиз.



Саз бу недир?

- а) иш алети;
- б) чалгъы алети.

О неден япила?

- а) джевиз я да дут агъачындан;
- б) чам я да эмен агъачындан.

Сазның къач тели бар?

- а) беш тели;
- б) эки чифт тели.

Эвель заманларда саз усталары не япа эдилер?

- а) йырлай эдилер;
- б) ойнай эдилер.

2. Экиндже абзацны дефтеринъизге язып алынъыз.

3. **Сазның, армуткъа, сазджы** сөзлеринде тамыр ве ялгъамаларыны бельгиленъиз.

Сазның ресимини япынъыз.





99-мешгъулиет. Джумлелерни дефтеринъизге кочюрип языныз.

1. Дюльгер **эренденен** чалыша.
2. Айванат багъчасында чешит **айванлар** ве къушларны корымек мумкун.
3. Айшечешмедин биркъопкъасув кетирди.
4. **Битам** Кезлев шеэринде дөгъды.
5. **Османчыкъ** бала багъчасына бара.




Къайд этильген сёзлерде тамыр ве ялгъамаларны бель-гиленъиз. Бу сёзлерде созукъ сеслерни талиль этинъиз.

Окъув

Эльмаз Бахыш

Яз акъшамы



Яз акъшамы. Кунь къавуша.
Ельнен тынчыкъ талаша.
Хафиф рузгяр эседжекте,
Онъа сыджакъ къарыша.

Тартышалар озьара,
Салкын тюше, айыра.
Такъатсыз кунь тиз чёкип,
Къона, ялны къыдыра.

Къызыл кольге уфукъта
Кунеш артындан бата.
Токъ кемер невбет тута
Танъ аткъандже догъуда.

Чыр-р чырылдай чырчырна,
Секирип кечти бакъя...
Артыкъ эр кес ятыша,
Тек бульбуллар сайраша.



1. Шиирни дикъкъатнен окъунъыз.
2. Муэллиф яз акъшамыны насыл этип тасвирлей?
Шиирге эсасланып, анълатынъыз.
3. «**Такъатсыз кунь тиз чёкип, Къона, ялны къыдыра**»
сатырларыны насыл анътайсынъыз?
4. Шиирни ифадели окъумагъа ограйниңиз.



- кунь къавуша — захід сонця
- уфукъ — небокрай
- чырылдамакъ — скрекотати
- сайрамакъ — співати

Къырымтатар тили

Ялгъама (девамы)

100-мешгъулиет. Берильген сёзлерге тамырдаш сёзлер язынъыз.

Тюкян — ..., кой — ..., эт — ..., къавал — ..., шеэр — ..., берекет —

101-мешгъулиет. Нокъталар ерине келишкен ялгъамаларны къойып, метинни дефтеринъизге язынъыз.

Къомшу кой... той олды. Решат анасынен той... барды. Той... адам пек чокъ эди. Чалгъыджылар той... дюльбер ве шень аваларнен яраштырдылар. Той... Решатнынъ эмджеси де бар эди. Олар той... берабер къайттылар.

Бу не демектир?

Достумнынъ гонълюни
Къазаннынъ тюбюни
Аягъымны  къырдым.

102-мешгъулиет. Ширии окъунъыз.

Ёлда сакът олуунъыз!



Ёлны кечмек керек олса,
Кечитлерден кечинъиз.
Учыфернерде ешиль янса,
Сонъ арекет этинъиз.

Ёлгъа чыкъкъан эр бир бала
Буларны бильмек керек:
Машиналар юрьген **ёлдан**
Сакът олып кечмек керек.

C. Усеинов



1. Учыфернинъ насыл ярыгъы янса, ёлны кечмек мумкүн?
 2. Ёлгъа чыкъкъан бала нени бильмек керек?
 3. Джевапларны дефтеринъизге язынъыз.
 4. Къайд этильген сёзлернинъ умумий къысмыны айтынъыз.
 5. Берильген сёзлерге тамырдаш сёзлерни язынъыз.
Ешиль, ... ,
Арекет, ... ,
- Ярдымджы сёзлер:** арекетли, ешиллик, арекетчен, ешильдже, арекетсиз.

103-мешгъулиет. Окъунъыз.

Къырымда чокъ шеэрлер бар. Оларның адларының тарихы пек меракълыдыр. Къырымның пайтахты Акъмесджит шеэридир. Акъмесджит акъ — «беяз» ве месджит — «джами» сёзлерinden келип чыкъкъан. Багъчасарай шеэрининъ ады «багъча» ве «сарай» сёзлерinden ибaret. Къарасувбазар шеэрининъ ады исе «къара», «сув», «базар» сёзлерinden келип чыкъкъан.



1. Къырымда даа насыл шеэрлер бар?
2. Акъмесджит, Багъчасарай, Къарасувбазар шеэрлерининъ адлары насыл сёзлерден келип чыкъкъан? Икяе этинъиз.
3. Сёзлерде тамырны къайд этинъиз:
Тарих, тарихчы, тарихий;
Ад, аддаш, адлы, адсыз;
Сёз, сёзлю, сёzsюз, сёзлюк.

104-мешгъулиет. Окъунъыз. Сёзлерге **-лы** я да **-ли** ялгъамаларыны язынъыз.

Къырым — къырым.. , Акъмесджит — акъмесджит.. , Багъчасарай — багъчасарай.. ;
шеэр — шеэр.. , ад — ад.. , меракъ — меракъ.. .

105-мешгъулиет. Окъунъыз.

Берабер күлюшнейик

Бир **огъланчыкъ койлюнинъ** эвине барып:
— Бизге бираз пичен береджек әкенсинализ, — дей.
— **Бабанъ** ичюнми? — деп сорай койлю.
— Ёкъ, — дей бала. — **Бабам** пичен ашамай,
атымыз ичюн!



Къайд этильген сёзлерни дефтеринъизге язып алышынъыз. Сёзлерде тамыр ве ялгъамаларны къайд этинъиз.



106-мешгъулиет. Джумлелерни дефтеринъизге дөгүру ве дюльбер кочюрип язынъыз. Эр бир джумледе не акъкында айтыла?

1. Къырым **дагълары** яилаларынен зен-гиндири. 2. Бир кунь **дагъджы** орманда сыгъын баласыны тапты. 3. Къушлар юкъламакъ ичүн тынч бир ер къыдыралар. 4. Сыджакъ улькелерде ич бир вакъыт сувукъ олмай. 5. Мавы кокте турналар къычырыша.



1. Къайд этильген сёзлернинъ умумий къысмыны бельгиленъиз.
2. **Сыгъын** сёзюнинъ схемасыны япынъыз.

Окъув

Февзи Алиев

Дагъларда йыр

Дагъларгъа бардым,
Бол нефес алдым.
Къая-ташны, деньиз, багъны
Гонълюмнен сардым.
Онынъ авасы!
Онынъ сефасы!
Эгер менден сорасанъыз,
Динъленъ авасын.

Багълама:
Бу дагълар гузель,
Бу багълар гузель,



Бу дияр гузельдир,
Бу деньиз гузель,
Бу къырлар гузель,
Урь Ватан бизимдир!

Дагъларгъа бардым,
Даа баарым.
Достларымнен шенъ-шерамет
Ойнар-йырларым.
Онынъ авасы!
Онынъ сефасы!
Эгер менден сорасанъыз,
Динъленъ авасын.

Багълама.



1. Бу йырда не акъкъында айтыла?
2. Йырны оғренинъиз.

СЁЗ ЧЕШИТЛЕРИ

Сёз чешитлери акъкъында умумий малюмат

Бизим нуткъумыз сёзлерден ибартыр. Сёзлер маналарына коре айры группаларгъа болюнелер. Сёзлерниң маналарына коре болюнмесине **сёз чешитлери** дейлер. Эр бир сёз чешити я да предметниң ады ола, я да предметниң аляметини ве иш-арекетини бильдире.

107-мешгъулиет. Метинни окъунъыз. Серлевасыны къюунъыз.

Улькемизге гузель баарь кельди. Кенътарлалар, яйлалар ешерди. Чёльде сары, мавы, къырмызы, мор тюсте чечеклер ачты. Багъчада къушлар шенъ йырлай. Бутюн табиат джанланды.



Башта предметлерниң адларыны, сонъ аляметни, сонъра иш-арекетни бильдирген сёзлерни язып алынъыз.

Нумюне:

- 1) баарь, ..., ...,
- 2) гузель, ..., ...,
- 3) кельди ..., ...,

Буны билинъиз!

Инсанлар, айванлар ве предметлерниң адлары: Эдем, Къашкъа, озен, маса. Бу сёзлер **исим** олур.

Предметлерниң аляметлерини бильдирген сөзлер: *татлы*, *узун*, *акыллы*, *дюльбер*. Бу сөзлер **сыфат** олур.

Предметлерниң иш-арекетини бильдирген сөзлер: *тике*, *яза*, *ойнады*, *бараджакъ*, *кетеджек*.

Бу сөзлер исе **фииль** олур.

108-мешгъулиет. Окъунъыз. Сөзлерге суаллер къюнъыз.

Яза, чам, окъуй, озен, буз, сары, чалыша, балкъурт, къыскъа, кобелек, учуджы, къайтаджакъ, зурафе, сипире, тар, секире, ярыкъ, раатлана.



Сөзлерни бойле тертипте язып алынъыз:

Исимлер: чам, ... ,

Сыфатлар: сары, ... ,

Фииллер: яза, ... ,

Исим, сыфат, фииль — **сөз чешитлери**.

109-мешгъулиет. Окъунъыз.

1. Эмине янъы антер кийди.
2. Алим багъчадан къуру пытакълар кетирди.
3. Кирпининъ тикенли урбасы оны душманлардан къорчалай.
4. Талебелер оджагъа дюльбер чечеклер багъышладылар.
5. Койлюлер байрамны ешиль дагъ этегинде кечирдилер.
6. Мен анама бахыш азырладым.



Джумлелерни дефтеринъизге кочюрип язынъыз. Исимлерни бир сыйыкънен, фииллерни — эки сыйыкънен, сыфатларны исе далгъалы сыйыкънен сыйынъыз.

110-мешгъулиет. Ресимге бакъынъыз. Суаллерге ве ярдымджы сёзлерге эсасланып, икяе тизинъиз. Икяени дефтеринъизге язынъыз. Ресимге серлева къюнъыз.



1. Ресимде насыл йыл мевсими тас-вирленген?
2. Тереклер ве осюмликлер не олды?
3. Кок насыл?
4. Этрафта нелер учалар?
5. Чечеклер насыл тюсте?
6. Яз насыл бир мевсимдир?

Ярдымджы сёзлер: яз, къушлар, кок, мавы, тереклер, сары, къырмызы отлар, кобелек, чивильдеше, чечеклер, ачты, учалар.

111-мешгъулиет. Берильген сёзлерни нумюне боюндан язып алынъыз.

Нумюне: сют — сютлю;

Сют, бузлу, къабакъ, къаймакълы, сютлю, шекер, буз, эт, къабакълы, йипек, къаймакъ, шекерли, кунеш, кучълю, йипекли, тер, кунешли, кучъ, терли, этли.



Бу сёзлер насыл суаллерге джевап берелер? Олар насыл сёз чешитлери ола?



112-мешгъулиет. Ашагыда берильген исимлерге келишкен сыйфатларны язынъыз.

Нумюне: джевизли аш.

... аш, ... ресим, ... армут, ... къыз, ... сокъакъ,
... боюнджакъ, ... кольмек, ... бибер, ... шеэр.

Къырымтатар тили

Сёз чешитлери акъкъында умумий малюмат (девамы)

113-мешгъулиет. Нокъталар ерине исимлерге келишкен фиииллерни язынъыз.

Нумюне: мышыкъ миявлай.

Мышыкъ ..., кукуккъуш ..., кунеш ..., къашкъыр ..., копек ..., ягъмур ..., йырджы ..., балалар ..., папий

Ярдымджы сёзлер: парылдай, вакъылдай, кукуклей, улуй, афыра, ойнайлар, йырлай, ягъя.

114-мешгъулиет. Берильген сёзлернен джумлелер тизинъыз.

1. Аким, алды, мектюп, достундан.
2. Бабам, къую, ве, къазалар, азбарда, агъам.
3. Суву, ола, деньиз, тузлу.
4. Акъбардакълар, ачты, дагъда.



Джумлелерниң баш азаларыны тапып, астыны сыйынъыз.

115-мешгъулиет. Метинни окъунъыз. Серлевасыны къюнъыз.

Бугунь анам пек болдурды. О чамашыр ювды. Мен анама къаве пиширдим.

— Буюрынъыз, аначыгъым, къаве азыр! — дедим.

Анам къаве ичип раатланды. Мен исе эвимизни джайыштырдым, савутларны ювдым. Соң анам къуругъан чамашырларны утюледи.



Ресимлерни бакъынъыз. Ресимге юкъарыдаки парчадан келишкен джумлени сечип, дефтеринъызге язып алынъыз.


116-мешгъулиет. Джумлелерни дефтеринъызге кочюрип язынъыз.

1. Кучълю ель токътады.
2. Къырмызы лялелер ачты.
3. Сувукъ къыш битти.
4. Къабакълы бурма пишти.



1. Эр бир сёзниң устюне насыл сёз чешити олғаныны язынъыз.
2. Джумлениң баш ве экинджи дередже азаларыны тапып, астыны сыйынъыз.

Бу не демектир?

Чөльде лялелер
Къардашым къапуны
Достум озь сырны  ачты.

117-мешгъулиет. Джумлелерни окъунъыз. Схемаларына дикъкъат этинъиз.

1. Шенъ ава эшитиле.

_____ ~~~ = .

2. Мавы кокте кунеш парылдай.

~~~~ ~~~ = .

3. Наджие сары, къырмызы чечеклерни сувара.

\_\_\_\_ ~~~, ~~~ = .



Дефтеринъизге кочюрип язынъыз. Муптеда ве хабернинъ астыны сыйынъыз.

**119-мешгъулиет.** Берильген схемаларгъа эсаслаңып, джумлелер уйдурып язынъыз.

1. ~~~, ~~~ = .

2. \_\_\_\_ = .

3. \_\_\_\_ ~~~ = .



**120-мешгъулиет.** Окъунъыз. Джумлелерге схемалар япынъыз.

1. Балалар азбарда топ ойнайлар.
2. Бизим койде мектеп къурулды.
3. Къартбабам танъда турды.
4. Мен копегиме аш бердим.




Джумлелерни дефтеринъизге кочюрип язынъыз. Баш ве экинджи дередже азаларынынъ астыны сыйынъыз.

## Оқыув

Идрис Асанин

### Ватан



Къырым — бизим Ватанымыз,  
Ватан — бизим Анамыз.  
Биз Ватанны бу дюньяда  
Энъ мукъаддес саямыз.

Мында асыл олды халкъым,  
Шекилленди тилимиз.  
Дагъы, ташы сёйлеп тура —  
Будыр бизим илимиз!!!

Козъяш чешме, Хансарайы,  
Абиделер, дюрбелер...  
Мында олар бизге мирас,  
Гонъюльге рух берелер.

Мында эр шей бизимкидир.  
Мында ер, кок бизимдир.  
Ватан — бизим Анамыздыр,  
Анамыз — бу Ватандыр.



1. Окъунъыз.
2. Ватан — бизим анамыз сатырыны насыл аньлайсынъыз?
3. Бизим халкъымыз къайда асыл олды?
4. Гонъюльге нелер рух бере?
5. Сиз яшагъан ерде насыл тарихий абиделер бар? Оларнынъ адларыны огренип, дефтеринъизге язынъыз.
6. Шиирни эзберленъиз.



- мукъаддес — священий, святый
- асыл олмакъ — утворитися, формуватися
- мирас — спадщина

## Къырымтатар тили

### Сёз чешитлери акъкъында умумий малюмат (девамы)

**121-мешгъулиет.** Кечильген мевзуны хатырланъыз ве джумлелерде нокъталар ерине келишкен сёзлерни къюнъыз.

1. Сёзлерниң маналарына коре болюнмесине ... ... дейлер.
2. Инсанлар, айванлар ве предметлерниң адларыны бильдирген сёзлер ... олур.
3. Предметлерниң аляметлерини бильдирген сёзлер ... олур.
4. Предметлерниң иш-арекетини бильдирген сёзлер ... олур.



Джумлелерни дефтеринъизге язып алынъыз.

**122-мешгъулиет.** Э. Бахышының «Яз акъшамы» ширинден бейитни дефтеринъизге язып алынъыз.

Чыр-р чырылдай чырчырна,  
Секирип кечти бакъя...  
Артыкъ эр кес ятыша,  
Тек бульбуллар сайраша.



Шиирден башта исимлерни, сонъра исе фиииллерни тапып язынъыз.

*Нумюне:*

1. Чырчырна, ..., ... . 2. Чырылдай, ..., ... .

**123-мешгъулиет.** Шиирни ифадели окъунъыз.



Байракъ тутам къолумда,  
Бирлик олсун халкъымыз.  
Бильсин эр кес Къырымда,  
Бу – бизим байрагъымыз.  
Байракъны яраштыра  
Алтын тюсте тамгъамыз.  
Бар олайыкъ дюньяда,  
Гуллесин Ватанымыз!

*С.Усеинов*



1. Шиир не акъкъында? Муэллиф шиирде ненен гъурлана? О не истей? Шиирге эсасланып, джевап беринъиз.
2. Оны окъугъанда, сизде насыл дуйгъулар пейда олды?
3. Байракъынъ тюсю ве алтын тюсте тамгъа нени темсиль этелер? Музакере этинъиз ве джевапны айтынъыз.
4. Шиирден биринджи сырагъа исимлерни, экинджи сырагъа исе фиииллерни язып алынъыз.

### 124-мешгъулиет. Тапмаджаларны окъунъыз.

Бир ана, бир де баба,  
Экисинде юзь бинъ бала.



Мавы атлас,  
Ине батмаз,  
Макъас кесmez,  
Терзи пичmez.



Дефтеринъизге кочюринъиз. Исимлерни тапып, устьлерине суаллерини язынъыз.



**125-мешгъулиет.** Берильген сыйфатларгъа келишкен исимни язынъыз.

Мавы ... , сары ... , татлы ... , узун ... , меракълы ... , акъыллы ... , тербиели ... , дюльбер ....



1. Дефтеринъизге кочюрип язынъыз.
2. **Татлы, дюльбер** сыйфатларынен джумлелер уйдурып язынъыз.

## Окъув

Миляра Саттарова

### Тарихий ве екяне Ватанымыз



Эр бир адамның озы Ватаны бар. Бу ерде о дөгъя, осе, яшай. Инсан тек Ватанында озюни тынч ве сербест дуя. Балыкъ — сувсуз, къуш — авасыз, инсан исе Ватансыз яшап оламаз.

Къырым — бизим тарихий ве екяне Ватанымыз, баба-деделеримизнин топрагъы. Бу топракта къырымтатар халкъы асыл олды. Халкъымызның озы темсиллери бар. Бу оның миллий байрагъы, тамгъасы ве гимни. Байрагъымыз мавы тюсте. Оның тюсю темиз кокни, мавы денъизни анъдыра. Байрагъымыздаки тамгъа теразе шеклинде. Теразе — адалет темсили. Белли эрбабымыз Номан Челебиджиханың «Ант эткенмен» шири халкъымызның гимнине чевирильди.

Сонъки йыллары халкъымыз озың ана-юртуна къайта. Ватандашларымыз яның эвлөр къурып, яваш-яваш яныңдан ерлешмеге башладылар. Артықъ, Къырымда дөгъгъан яның несиль осе. Ватанымыздың келеджеги шу несильнен бағылышыр.

Халкъымызда Ватан акъкъында бойле аталарап сёзлери бар: «Ватан — экинджи анаң», «Ватансыз адам — къанатсыз къуш».

Бизим зенгин ве дюльбер тилимиз бар. Биз озың ана тилимизни яхшы бильмек, эр вакъыт озың ана тилимизде лакъырды этмек борджлумыз. Тиль олмаса, халкъ олмаз!



1. Ватан бу недир?
2. Инсан озюни тынч ве сербест не ерде дуя?
3. Бизим тарихий ве екяне Ватанымыз недир?
4. Халкъымыздың насыл темсиллерини билесинъиз? Олар акъкъында икәе этинъиз.
5. «Ант эткенмен» шириини ким язды? О неге чевирильди?
6. Биз не япмагъа борджлумыз?
7. Аталар сёзлерини дефтеринъизге язып алышыз ве эзберленъиз.



Къуш ювасыз олмаз, инсан — эвсиз.

Ватансыз адам — йырсыз бульбуль.

Халкъының бир эви бар, о да — Ватан.

Эр кеске озың Ватаны татлы.



- сербест — вільний (-а)
- екяне — єдиний (-а)
- темсиль — символ
- теразе — ваги
- несиль — покоління

## Имля лугъаты

|               |            |           |
|---------------|------------|-----------|
| абидé         | йигít      | такъвýм   |
| абунé         | йылды́з    | тадж      |
| абунеджí      | йылдырым   | тенеффюс  |
| авдармáкъ     | kestané    | тикéн     |
| <b>баá</b>    | кеvгир     | тилéк     |
| бааламáкъ     | кочьмék    | тюкюльмéк |
| багъ          | кягъыт     | утюлемéк  |
| бурун         | къабаат    | ушюмéк    |
| <b>Ватáн</b>  | къайтармá  | Фуртуна́  |
| виргюль       | къайыкъ    | фурун     |
| гоныюль       | къыяфет    | хатыра́   |
| гүгюом        | лакъша́    | хафиф     |
| гъарип        | лаф        | цирк      |
| гъыда         | лякин      | чамúр     |
| <b>дайы</b>   | мадде́     | чиленгир  |
| демёт         | медениёт   | джами́    |
| демир         | накълиé    | джекирмéк |
| демирджи      | нурлú      | шадырва́н |
| елéк          | оғъул      | шайн      |
| еранé         | оззара́    | шимáль    |
| ешиль         | орькéн     | ынтылúв   |
| <b>ёргъáн</b> | пападиé    | ынтылмáкъ |
| ёргъун        | перчém     | эеджáн    |
| ёргъуна́      | пуска́     | энди      |
| жалюзи        | пуськюrmék | эрба́п    |
| жетон         | разылыкъ   | ювéз      |
| <b>зейтюн</b> | рузгár     | юмрúкъ    |
| зумбууль      | сайламáкъ  | ютум      |
| зурафе́       | сайы́      | явлúкъ    |
| <b>имдáт</b>  | сейирджí   | ясланмáкъ |
| инджé         | сийрек     |           |

## Синонимлер лугъаты

- 1) абиде — эйкель
- 2) адий — саде
- 3) азат — сербест
- 4) азгын — арыкъ
- 5) азиз — мукъаддес
- 6) айнеджилик — къурназлыкъ
- 7) айрет — тааджип
- 8) айретленмек — тааджипленмек
- 9) айтылыш — теляффуз
- 10) баба-деде — эдждат
- 11) багъ — юзюмлик
- 12) багъджы — юзюмджи
- 13) бельги — ишарет
- 14) бенъземек — ошамакъ
- 15) болдурмакъ — ёрулмакъ
- 16) буюк — балабан
- 17) ватандаш — юртдаш
- 18) гизли — сырлы
- 19) гонъюль — юрек — къальп
- 20) гъагъа — чокъуч — таки
- 21) дайре — тёгерек
- 22) девлет — дияр — мемлекет — ульке
- 23) дёгме — садеф
- 24) догъмуш — сой — акъраба
- 25) дуймакъ — сезмек
- 26) заваллы — бичаре — гъарип
- 27) зарар — зиян
- 28) зенаат — унер
- 29) изин — мусааде — рухсет
- 30) итибар — урьмет — сайгъы

## Антонимлер лугъаты

- 1) агъыр — енгиль
- 2) адий — муреккеп
- 3) анда — мында
- 4) азлыкъ — чокълукъ
- 5) акъикъат — ялан
- 6) акъыллы — акъылсыз
- 7) балабан — уфакъ
- 8) генч — къарт
- 9) генчлик — къартлыкъ
- 10) дост — душман
- 11) зевкълы — зевкъсыз
- 12) индже — къалын
- 13) ич — тыш
- 14) кок — ер
- 15) къалын — индже
- 16) къурмакъ — бозмакъ
- 17) къыскъа — узун
- 18) тербиели — тербиесиз
- 19) лезетли — лезетсиз
- 20) сабырлы — сабырсыз
- 21) севмек — севмемек
- 22) токъ — ач
- 23) тузлу — тузсуз
- 24) файда — заар
- 25) хош — хошсуз
- 26) шифалы — шифасыз
- 27) эдепли — эдепсиз
- 28) эйилик — кемлик
- 29) юксек — алчакъ
- 30) язлыкъ — къышлыкъ

## **Омонимлер лугъаты**

### **Ал**

1. Ренклернинъ бири.
2. Алмакъ фиилининъ шекили.

### **Ат**

1. Айван ады.
2. Атмакъ фиилининъ шекили.

### **Багъ**

1. Юзюм багъы.
2. Алякъа
3. Пичен багъы.

### **Сагъ**

1. Тири.
2. Онъ.

### **Саз**

1. Чалгъы алети.
2. Батакъ.

### **Серги**

1. Рессамлар сергиси.
2. Юзюм сергиси.

### **Къой**

1. Айван ады.
2. Къоймакъ фиилининъ шекили.

### **Эль**

1. Къол.
2. Халкъ, джемаат.

### **Яз**

1. Йыл мевсими.
2. Язмакъ фиилининъ шекили.

## Изалама лугъат

### Ада

1. Эр тарафтан сувнен къаплагъан ер къысмы.  
*Бунъа дерлер «Ешиль ада»,  
Къоджамандыр Чатырдагъ.*

### Ава

1. Ерниң атмосферасыны тешкиль эткен газларның къарышмасы.  
*Ер темелини газларның къарышмасы  
тешкиль эте.*
2. Музыка бирдемлигини, нагъмени тешкиль эткен аэнкли арды-сыралы сеслер.  
*Бабам бу аваны кеманеде яхшы чала.*
3. Бир де бир ерде, бир де бир вакъытта атмосфераның алы.  
*Бугунъ Акъмесджитте ава сыйджакъ.*

### Алем

1. Бутюн дюнъя.
2. Бутюн ер, мемлекетлер.  
*Бабам — учуджы, о бутюн алемни корьди.*

### Базарэртеси

1. Афтаның биринджи күнү (базардан соң).  
*Базарэртеси къыш татили башлана.*

### Къараман

1. Озың джесюрлигинен, йигитлигинен, дженкте я да эмекте къараманлықъ арекетинен айрылгъан адам.  
*Аметхан Султан — Советлер Бирлигининъ  
Эки дефа Къараманы.*

2. Эдебий эсернинъ эсас шахыслары.  
*«Тильки ве къоян» масалынынъ мусбет къа-раманы — кирпи.*

### **Къозу**

1. Къойнынъ баласы.  
*Дагъ четинде бир къозу  
Отлап юре бир озю.*

### **Тай**

1. Атнынъ баласы.  
*Меним тайым джийрен къашкъа,  
Къамыш къулакъ, ал аякъ.*

### **Турна**

1. Узун аякълары ве боюны, узун дөгъру гъагъасы олгъан балабан кочюджи къуш.  
*Бакъынъыз, балалар,  
Турналар кочелер!*

### **Тамыр**

1. Ертюбюнде олгъан осюмликлерниң къысмы.  
*Джевиз терегининъ тамыры пек къавий.*
2. Тишнинъ, сачнынъ ички къысмы.  
*Тишнинъ тамырыны тедавийлемек керек.*
3. Манаджа якъын сёзлерниң умумий къысмы.  
*Достлукъ, достча, доступ сёзлерининъ тамыры — дост.*

## Тамырдаш сёзлернинъ лугъаты

- 1) абуне, абунеджи
- 2) ана, аналыкъ
- 3) араба, арабаджы, арабаджылыкъ
- 4) армут, амутлы, армутлыкъ
- 5) аш, ашчы, ашлыкъ, ашамакъ
- 6) геми, гемиджи
- 7) дагъ, дагълы, дагъджы
- 8) ёл, ёлджу, ёлдаш
- 9) кой, койлю, койдеш
- 10) лезет, лезетли, лезетсиз
- 11) мана, манаджа, маналы, манадаш
- 12) мусафир, мусафирчен, мусафирлик
- 13) намус, намуслы, намуссыз, намуслылыкъ
- 14) нумюне, нумюневий, нумюнели, нумюнелик
- 15) нур, нурлу, нурсуз, нурланмакъ
- 16) огъур, огъурлы, огъурсыз, огъурсызлыкъ
- 17) ойма, оймаджы, оймаджылыкъ, оимакъ
- 18) осьмек, осьмюр, осьмюрлик
- 19) сабыр, сабырлы, сабырсыз, сабырсызлыкъ
- 20) сёз, сёзлюк
- 21) сют, сютлюк, сютлю, сютсюз, сютчи
- 22) тарих, тарихий, тарихчы
- 23) таш, ташчы, ташлы
- 24) тербие, тербиели, тербиесиз, тербиесизлик
- 25) тиш, тишли, тишилиз, тишлемек
- 26) туз, тузлукъ, тузлу, тузсуз, тузламакъ
- 27) удж, уджлу, уджламакъ
- 28) фурун, фурунджы, фурунджылыкъ
- 29) хаста, хасталанмакъ, хасталыкъ, хастахане
- 30) чабик, чабиклик, чабиклетмек
- 31) юзъ, юзъбез, юзълю, юзъсоз
- 32) ягъмур, ягъмурлы, ягъмурлыкъ, ягъмурсыз

## Мундеридже

|                                                                                                      |    |
|------------------------------------------------------------------------------------------------------|----|
| Кырымтатар тили. <b>ДЖУМЛЕ</b> . Джумле<br>акъкъында малюмат.....                                    | 3  |
| Окъув. Тильки ве къашкъыр ( <i>масал</i> ).....                                                      | 5  |
| Кырымтатар тили. Джумле акъкъында<br>малюмат ( <i>девамы</i> ) .....                                 | 10 |
| Окъув. Достлар. Эскендер Фазыл.....                                                                  | 13 |
| Кырымтатар тили. Икяе, суаль ве эмир<br>джумлелери .....                                             | 15 |
| Окъув. Кышбабаны беклеп. Шакир Селим.....                                                            | 17 |
| Кырымтатар тили. Икяе, суаль ве эмир<br>джумлелери ( <i>девамы</i> ).....                            | 18 |
| Окъув. Къар. Эшреф Ибраим .....                                                                      | 20 |
| Кырымтатар тили. Нида джумлеси.....                                                                  | 21 |
| Окъув. Эгиз къозулар. Наджие Аметова .....                                                           | 23 |
| Кырымтатар тили. Джумле азалары. Джумленинъ<br>баш азалары: муптеда ве хабер .....                   | 27 |
| Окъув. Биринджи акъбардақъ. Лёман Сулейман..                                                         | 30 |
| Кырымтатар тили. Джумле азалары. Джумленинъ<br>баш азалары: муптеда ве хабер ( <i>девамы</i> ) ..... | 32 |
| Окъув. Баарь мевсими. Эрдживан Керменчикли....                                                       | 34 |

|                                                                               |    |
|-------------------------------------------------------------------------------|----|
| Къырымтатар тили. <i>Джумленинъ экинджи</i><br>дередже азалары .....          | 35 |
| Окъув. Къарылгъач кельди. <i>Субхи Валиев</i> .....                           | 38 |
| Къырымтатар тили. <i>Джумледе сёзлерниң</i><br>бири-биринен багъы .....       | 40 |
| Окъув. Орман бахшышы. <i>Гульнара Умерова</i> .....                           | 42 |
| Къырымтатар тили. Сёз бирикмеси.<br>Баш ве таби сёз .....                     | 47 |
| Окъув. Баарь ягъмуры. <i>Энвер Къафадар</i> .....                             | 49 |
| Къырымтатар тили. Адий ве муреккеп джумлелер ..                               | 50 |
| Окъув. Мераметли инсанлар. <i>Мерьем Османова</i> ..                          | 52 |
| Къырымтатар тили. <b>СЁЗ.</b> Сёзниң лексик манасы .                          | 55 |
| Окъув. Тезден апрель. <i>Рефат Чайлакъ</i> .....                              | 57 |
| Къырымтатар тили. Сёзлерниң дөгъру<br>ве кочьме манасы .....                  | 58 |
| Окъув. Турначыкъ. <i>Субхи Валиев</i> .....                                   | 60 |
| Къырымтатар тили. Омонимлер.....                                              | 62 |
| Окъув. Мевсим баарь. Якъуб Шакир-Али .....                                    | 65 |
| Къырымтатар тили. Синонимлер .....                                            | 66 |
| Окъув. Мераба, Хыдырлез! <i>Сание Саттарова</i> .....                         | 68 |
| Къырымтатар тили. Антонимлер .....                                            | 70 |
| Окъув. Къырымның баари. <i>Изет Эмиров</i> .....                              | 72 |
| Къырымтатар тили. <b>СЁЗ ТЕРКИБИ.</b> Сёзниң<br>тамыры. Тамырдаш сёзлер ..... | 73 |
| Окъув. Койлю ве тильки ( <i>масал</i> ) .....                                 | 76 |

|                                                                                 |     |
|---------------------------------------------------------------------------------|-----|
| <i>Кырымтатар тили.</i> Ялгъама (аффикс).....                                   | 78  |
| <i>Окъув.</i> Къартал. Лев Толстой.....                                         | 80  |
| <i>Кырымтатар тили.</i> Ялгъама (девамы) .....                                  | 83  |
| <i>Окъув.</i> Яз акъшамы. Эльмаз Бахыш.....                                     | 84  |
| <i>Кырымтатар тили.</i> Ялгъама (девамы) .....                                  | 85  |
| <i>Окъув.</i> Дагъларда. Февзи Алиев.....                                       | 88  |
| <b>Кырымтатар тили. СЁЗ ЧЕШИТЛЕРИ.</b>                                          |     |
| Сёз чешитлери акъкъында умумий малюмат ...                                      | 90  |
| <i>Кырымтатар тили.</i> Сёз чешитлери акъкъында<br>умумий малюмат (девамы)..... | 93  |
| <i>Окъув.</i> Ватан. Идрис Асанин .....                                         | 96  |
| <i>Кырымтатар тили.</i> Сёз чешитлери акъкъында<br>умумий малюмат (девамы)..... | 97  |
| <i>Окъув.</i> Тарихий ве екяне Ватанымыз.                                       |     |
| <i>Миляра Саттарова</i> .....                                                   | 100 |
| Имля лугъаты .....                                                              | 102 |
| Синонимлер лугъаты .....                                                        | 104 |
| Антонимлер лугъаты .....                                                        | 105 |
| Омонимлер лугъаты .....                                                         | 106 |
| Изалама лугъат .....                                                            | 107 |
| Тамырдаш сёзлернинъ лугъаты .....                                               | 108 |

*Навчальне видання*

**Саттарова Міляра Сейтвеліївна, Саттарова Саніє Сетвеліївна**

**КРИМСЬКОТАРСЬКА МОВА ТА ЧИТАННЯ**

*підручник для 3 класу з навчанням кримськотарською мовою закладів  
загальної середньої освіти (у 2-х частинах)*

Частина 2

*Рекомендовано Міністерством освіти і науки України*

Відповідальний за випуск І. Б. Чегертма

Редактор А.Ш. Сейт-Джеліль

Дизайн та верстка Н. Е. Бекірова

Художник З. Ш. Хайредінова

У підручнику використано матеріали з вільних інтернет-джерел

Формат 70x100/16.

Ум. друк. арк. 9,07. Обл.-вид. арк. 10,00.

Наклад 300 прим. Зам. № 1508.

Видавець і виготовлювач видавничий дім «Букрек»  
вул. Радищєва, 10 м. Чернівці. 58000

Свідоцтво про внесення до Державного реєстру  
суб'єкта видавничої справи ЧЦ № 1 від 10.07.2000 р.



